

Part 9: N'idèja an sla relatività

I vardoma giusta da 'ndova a riva la relatività e quaicòs èd lòn che a implica. I vardoma prima com a l'era la relatività 'd Galileo, e l'invariansa dle lèj èd Newton an coj che a j'ero considerà ij sistema inersiaj. Peui i vardoma le dificoltà che a l'han portà j'equassion èd Maxwell che a dëscrivo ij camp eletro-magnétich, e ij tentativ pér superé coste dificoltà. I passoma peui a vardé le trasformassion èd Lorentz e la teorìa dla Relatività strèita èd Einstein. I vardoma donca còs a compòrta sòn an sle longhèsse, an suj temp e an 's le masse. I finima con considerassion su massa e energia e le corispondente relassion. I disoma peui quaicòs an sl'aplicassion dij formalism Lagrangian e Hamiltonian a la Relatività. I tratoma gnenet dla relatività general.

TAULA DLA PART CH'A FÀ EUT

Achit	267
La relatività 'd Galiléo	269
Trasformassion èd Galiléo	270
Invariansa dle longhèsse	271
Composission dle velocità	271
Invariansa dle lèj èd Newton	272
El problema dij camp eletro-magnétich	273
L'ipòtesi 'd l'étere	273
Le trasformassion èd Lorentz	273
L'esperiment èd Michelson	273
Aberassion astronòmica anual	276
Esperiensa 'd Fizeau	276
An conclusion	277
Ij prinsipi 'd relatività strèita	279
La relatività d'Einstein	279
Obiession a la relatività 'd Galiléo	279
Le trasformassion èd Lorentz	280
Consegoense	282
Misura 'd longhëssa	283
Misura èd n'interval èd temp	283
Considerassion su coste conclusion	284
Cinemàtica relativistica	285
Cronotòpo ò spassi-temp	287
Metod geométrich an doe dimension (x, t)	287
Estension a tre dimension (x, y, t)	288
Estension a quat dimension (z, y, z, t)	289
Dinàmica relativistica	291
Massa relativistica èd na partìcola	291
Equassion fondamentaj	293
Massa e energia	294
Misure 'd verifica sperimental	295
Verifica dla dipendensa dla massa da la velocità	295
Verifica dl'echivalensa energia-massa	295
Formulassion Lagrangian-a e Hamiltonian-a	297
Formulassion Lagrangian-a	297
Fòrsa 'd Lorentz ant un camp eletro-magnétich	297

Formulassion Hamiltonian-a.....	298
An conclusion	299

TÀULA DLE FIGURE DLA PART CH'A FÀ EUT

Figura 1 - Esperiment èd Michelson.....	274
Figura 2 - Misura 'd Michelson. Cont èd τ_2	275
Figura 3 - Aberassion anual.....	276
Figura 4 - Esperiensa 'd Fizeau.....	277
Figura 5 - Simultaneità an doi sistema an moviment.....	280
Figura 6 - Misura 'd longhëssa d'un segment.....	284
Figura 7 - Misura relativistica 'd temp	284
Figura 8 - Spassi-temp pér un pont an s'ass x.....	287
Figura 9 - Spassi-temp pér un pont an sël pian xy.....	289
Figura 10 - Variassion dla massa con la velocità.....	293

ACHIT

Sta part dë ste nòte a son giusta na sempia dëscrisson ed còs a l'é la reltività, e a diso quaicòs an sla "relatività strèita" (limità ai sistema d'arferiment inersiaj). A diferensa dla Mecànica Analítica, dont ij pont ed partensa e ij prim èsvilup i l'oma vist ant la part ch'a fà eut, sì as trata nen ed na dëscrisson diferenta e pì potenta, ma ed la dimostrassion che tuta la mecànica clàssica a l'é na dëscrisson aprossimà dla realitat, contut che as trata ed n'aprossimassion motobin precisa pér coi fenòmeno che a son esperiensa comun-a e nen mach.

Sòn a veul nen dì che la Mecànica Clàssica a sia quaicòs ed superà, prima 'd tut pérchè a furniss ij prinsipi e le relassion ed base che a servo 'dcò a la Relatività, e peui pérchè sò camp d'aplicassion a l'é motobin largh e, an sto camp, a saria d'autut inùtil compliché le còse con ij prinsipi e ij métod dla Relatività.

An pràtica, se i pensoma a fenòmeno mecànich pur, con velocità bin lontan-e da cola dla lus, la mecànica newtonian-a a va pì che bin. Se anvece i pensoma al moviment ed particole sub-atòmiche opura a l'eletromagnetism e an particolar a la propagassion dle onde eletromagnétiche, ij cont a torno pì nen.

An efét a l'é stait pròpi cand a l'é tratàsse dë scrive j'equassion ed costa propagassion (Maxwell) che a l'é capisse che a ventava cambié 'l concèt che tuti a l'han, an manera natural, ed còs a l'é 'l temp.

Fin-a a col moment ël temp a l'era stait considerà n'entità che a valìa sempe istéss an tut l'univers e pér qualonque sistema d'arferiment, coma se a fussa stabilì da na mostra universal ùnica. Na coordinà che a chérs an manera costanta e pér tuti a l'istéssa manera.

Ant un sistema inersial, i l'oma vistlo, le lèj dla Física a l'han validità imedià e a manten-o la stessa forma an qualonque sistema inersial (an tuti ij sistema "*inersiaj*" che a sio an moviment drít costant fra 'd lor). Pér passé da un sistema d'arferiment *Oxyz* a l'autr *O'x'y'z'* a-i son le trasformassion ed Galileo, che suponen doi sistema a sio orientà a l'istessa manera e che la velocità relativa v dij doi a sia direta arlong l'ass x , a piyo la forma:

$$x' = x - vt \quad ; \quad y' = y \quad ; \quad z' = z \quad ; \quad t' = t$$

Se coste expression a ven-o derivà rispét al temp as oten-o le régole d'adission dle velocità second la teoria dla relatività ed Galileo. Vis-a-dì, ciamand \mathbf{u} e \mathbf{u}' le velocità ant ij doi sistema i l'avroma : $u'_x = u_x - v \quad ; \quad u'_y = u_y \quad ; \quad u'_z = u_z$

An particolar, la lèj fondamental dla dinàmica $\mathbf{F} = m \cdot \mathbf{a}$ a venta che a sia verificà an tutti costi sistema. Tut sòn a veul di che as piya pér bon che, arferendse a un qualonque sistema inersial, na preuva a dà l'istéss arzulta daspèrtut ant l'univers e an qualonque moment e, 'ncora, che la massa a l'é nè scalar costant. Pì che tut peui, sòn a supon che 'l temp a sia l'istéss pér qualonque sistema d'arferiment e che a sia sempe l'istéss pér qualonque situassion.

An pì i l'oma che as piya che l'assion ed na massa as propaga an tut l'univers a na velocità che i podoma dì "anfinìa".

A l'é an sto contest ed conossense che a l'é rivà 'l problema dla propagassion dël camp eletromagnétich e dle relative onde.

Sòn i lo vöddroma ampressa an cost'ùltima part dë sta session dle Nòte. I notoma pitòst che ant le considerassion a la base dla teoria a-i son le proprietà dël camp eletro-magnétich, e che donca a peul giuté ël vardé prima la session sinch e an particolar soa part eut.

Pàgina lassà veuida apòsta

LA RELATIVITÀ 'D GALILÉO

I l'oma vist coma la Mecànica Clàssica as òcupa, pì che tut, dël moviment dij còrp sota l'assion èd fòrse, e a dëscriv sòn travers relassion fra le diférente grandësse (coma velocità, acelerassion, moment, e via fòrt). Na grandëssa a l'é an general na fonsion dla posission e dël temp dël tipo $A = A(x, y, z, t)$ e le lèj fisiche a son relassion fra coste grandësse che a peulo esse arpresentà con equassion dël tipo $f(A, B, C, \dots) = 0$.

Donca as trata dë stabili un sistema d'arferiment, che i podoma consideré cartesian, contut che qualonque sistema 'd coj ch'i loma vist a peussa andé bin, e peui as trata dë stabili na misura dël temp.

A l'é ciàir che un sistema d'arferiment S a ven sernù an fonsion dël particolar problema, e che un fenòmeno a peul esse dëscrivù arferendse a un diférent sistema d'arferiment S' , che a peul èdcò esse an moviment rispèt a un sistema d'arferiment S .

Un problema a l'é col dë stabili com as trasformo le relassion dle lèj fisiche passand da un sistema d'arferiment a n'àutr, che an general i suponoma ch'a sia an moviment rispèt al prim.

An general costa trasformassion a l'é dàita dal sistema d'equassion:

$$\begin{aligned}x' &= x'(x, y, z, t) \\y' &= y'(x, y, z, t) \\z' &= z'(x, y, z, t) \\t' &= t'(x, y, z, t)\end{aligned}$$

andova x', y', z', t' a son le variàbij dle spassi e dël temp ant èl neuv sistema S' . Le grandësse a pijo donca la forma $A'(x', y', z', t')$ e 'dcò le lèj fisiche a pijo la forma $f'(A', B', C', \dots) = 0$, e a peulo esse considerà fonsion èd x', y', z', t' .

I l'oma già vist che, an general, a sta mira i l'avroma che $f \neq f'$ se 'l moviment d'un sistema rispèt a l'àutr a l'é qualonque.

A dventa d'interésse, anvece, consideré 'l cas andova ij doi sistema S e S' a son an moviment linear uniform l'un rispèt a l'àutr. Pér costi cas (com i l'oma già vist), Galiléo a l'ha stabili sto "Prinsipi èd relatività" (galileian-a):

Le lèj che a goerno ij femòmeno mecànich an doi sistema d'arferiment S e S' che a sio an moviment drit e costant fra 'd lor a l'ha la stéssa forma.

Vis-a-dì che la lèj $f(x, y, z, t) = 0$ a resta l'istéssa e 'l fenòmeno a l'é dëscrivù da l'istessa fonsion $f(x', y', z', t') = 0$, ant ij doi arferiment S e S' .

Se i consideroma la lèj èd Newton $\mathbf{F} = m \cdot \mathbf{a}$, che a anlia la fòrsa \mathbf{F} che a agiss an 's na massa m con l'acelerassion \mathbf{a} che a pròvoca, costa a l'é considerà válida ant un sistema d'arferiment ch'a sia arferì a le stèile fisso (stèile che da sécoj a manten-o soa posission sensa cambiament sensibij).

Se i pensoma a un sistema solidal con la tèra, e donca dotà d'acelerassion (la tèra a vira su sò ass e a vira 'ntorma al sol), costa lèj èd Newton a val pì nen, com i l'oma vist ant la part 4, pérchè a sponto "fàusse fòrse" dàite da l'acelerassion dël sistema d'arferiment.

L'assion "simulà" da coste fòrse a l'é motobin cita, e pér vaire problema a peul esse trascurà, ma macassia an sla tèra a venta consideré che $\mathbf{F}' \neq m \cdot \mathbf{a}'$. As manten anvece la relassion $\mathbf{F}' = m \cdot \mathbf{a}'$ an tutti ij sistema an moviment drit costant rispèt a un sistema d'arferiment "steilar".

Tuti ij sistema arferì a stèile fisso e tutti coj an moviment drit costant rispèt a costi a son ciamà "sistema d'arferiment inersiaj". I podoma definìje dovrànd soe proprietà : - 1) - Le relassion spassiaj, determinà da règoj rèid e fiss ant èl sistema a seguo la geometria d'Euclide. - 2) - A esist ant èl sistema un temp universal tal che na particola libera ant èl sistema a sodisfa al prinsipi d'inersa, vis-a-dì se a resta fèrma se a l'era fèrma ò a continua a bogisse con un moviment drit costant se as bogiava parèj.

Pér podèj aceté coste definission a ventrià 'dcò consideré che ant un sistema inersial a-i é nen n'acelerassion èd gravità ma a basta consideré la presensa èd na fòrça esterna, che a l'é 'l pès). A venta peui consideré un "temp universal", vis-a-dì che a particole an moviment a son socià 'd "mostre" pér arlevé 'l temp èd passagi ant un pont, e che a l'é possibl "sincronisé" coste mostre an manera che con èl temp segnà da ognidun-a le lèj dla mecanica as manten-o omogénie e isòtropie.

Trasformassion èd Galiléo

As trata dë stabilì le trasformassion che a përmëtto 'd passé da un sistema inersial S a n'autr S' an moviment con velocità drita costanta w rispét al prim. A venta che a sio verificà e che as manten-o le lèj mecaniche e an particolar la lèj fondamental $\mathbf{F} = m \cdot \mathbf{a}$.

A-i son doe ipòtesi che a ven-o fàite ant la fisica èd Galiléo e Newton (prima dla relatività).

- **A esist un temp absolut.** Valadì : As peulo regolé le mostre dij doi sistema an manera che a indico l'istéss temp, e che donca al temp t ant èl sistema S a corispond èl temp $t' = t$ ant èl sistema S' .

- **Èl moviment a l'é ressiproch.** Valadì : A l'é franch istéss consideré che S' as bogia con velocità w rispét a S opura che S as bogia con velocità $-w$ rispét a S' . Donca da na mira cinemàtica as peul consideré "ferm" un qualonque dij doi sistema. Se pér passé dal prim a lë scond a-i é na relassion $\mathbf{r}' = f(\mathbf{r}, t; w)$, pér èl passagi invers a val la relassion $\mathbf{r} = f(\mathbf{r}', t'; -w)$.

I partoma a consideré che an doi sistema inersiaj a venta ch'a vala 'l prinsipi d'inersia, e donca se un pont material nen sogét a fòrse as bogia ant èl sistema S con moviment drit costant, an manera che a valo j'expression:

$$x = a_1 t + b_1 \quad ; \quad y = a_2 t + b_2 \quad ; \quad z = a_3 t + b_3$$

a venta che sto tipo 'd moviment a sia vist èdcò ant èl sistema S' , e donca che a sia (con $t = t'$) :

$$x' = \alpha_1 t + \beta_1 \quad ; \quad y' = \alpha_2 t + \beta_2 \quad ; \quad z' = \alpha_3 t + \beta_3$$

Pér che sòn a sìa possibl a venta che x', y', z' , a sio fonsion linear èd x, y, z, t . Sensa gavé generalitatà i podoma peui supon-e che al temp $t = 0$ j'orìgin dij doi sistema a coincido. Le relassion èd trasformassion a saran dël tipo:

$$\begin{cases} x' = a_{11} x + a_{12} y + a_{13} z + a_{14} t \\ y' = a_{21} x + a_{22} y + a_{23} z + a_{24} t \\ z' = a_{31} x + a_{32} y + a_{33} z + a_{34} t \\ t' = t \end{cases}$$

e as trata 'd trové ij dodes coeficent a_{hk} .

I consideroma, pér semplifiché, che 'l moviment fra S e S' a sia na traslassion arlongh l'ass x , e che al moment inissial j'ass dle doe trien-e a sio coincident. An coste condission i l'oma che la coordinà y' a dipend nen da x, z, t , parèj coma z' a dipend nen da x, y, t . Donca i l'avroma che

$$a_{21} = a_{23} = a_{24} = a_{31} = a_{32} = a_{34} = 0$$

Peui i l'oma che, dàita l'isotropia dlë spassi, le doe coordinà y e z a son tratà a l'istéss manera, e sòn a pòrta che a venta ch'a sìa $a_{22} = a_{33}$. I podoma ciamé sto coeficent comun $\lambda(w)$, suponend che a peussa esse pér asar fonsion dla velocità w . J'equassion pér y' e z' a dvento:

$$y' = \lambda(w) y \quad ; \quad z' = \lambda(w) z$$

Ma i l'oma fàit l'ipòtesi èd ressiproxità dël moviment, an manera che se i consideroma S' ferm e S con velocità $-w$ a venta ch'a sia 'dcò:

$$y = \lambda(-w) y' \quad ; \quad z = \lambda(-w) z'$$

che, se confrontà con cole 'd prima a diso che $\lambda(w) \cdot \lambda(-w) = 1$

Se i cambioma giusta 'l vers positiv dl'ass x , la velocità w a ven sostituìa da $-w$, ma pér y e z a còmbia gnente, e donca j'equassion

$$y' = \lambda(-w)y \quad ; \quad z' = \lambda(-w)z$$

a venta ch'a coincido con j'equassion éd prima

$$y' = \lambda(w)y \quad ; \quad z' = \lambda(w)z$$

a venta donca ch'a sia $\lambda(w) = \lambda(-w)$, ma dal moment ch'i l'oma vist che $\lambda(w) \cdot \lambda(-w) = 1$, antlora i podoma scrive che $[\lambda(w)]^2 = 1$, e, an definitiva, che $\lambda(w) = \pm 1$

Dal moment che i l'oma assumù che y e z a l'àbio j'istéssi vers éd y' e z' , i pijoma sens'èutr èl valor positiv e donca $\lambda(w) = 1$.

I comensoma donca a stabili che, oltra a $t' = t$, che a fasìa part éd nòstre ipòtesi, i l'oma 'dcò che $y' = y$ e che $z' = z$.

Pér lòn ch'a rësguarda l'ass x , i notoma che se un pont a l'é ferm ant èl sistema S' , a venta che a trasla con velocità w rispét al sistema S , e donca a venta ch'a sia che cand x' a l'é costant, antlora a venta ch'a sia costant èdcò $(x - wt)$. Donca i l'avroma che :

$$x' = \mu(w)(x - wt)$$

ma pér la resiprossità dël moviment a venta 'dcò ch'a vala l'espression

$$x = \mu(-w)(x' + wt)$$

che a l'é compatìbil con cola dzora mach se $\mu(w) = \mu(-w) = 1$

Le trasformassion éd Galieo sercà a son donca:

$$x' = x - wt \quad ; \quad y' = y \quad ; \quad z' = z \quad ; \quad t' = t$$

mentre le trasformassion inverse a son:

$$x = x' + wt \quad ; \quad y = y' \quad ; \quad z = z' \quad ; \quad t = t'$$

Invariansa dle longhësse

Na congegoensa 'd coste trasformassion, che a smija scontà, ma che a l'é méj ten-e da cont pér dòp, a l'é l'invariansa dle longhesse ant ij doi sistema d'arferiment. I suponoma d'avèj un segment paralél a l'ass x ant èl sistema S . Se A e B a son j'estréim dël segment, soa longhëssa, ant èl sistema d'arferiment S , a sarà $l = x_B - x_A$.

Ant èl sistema d'arferiment S' i l'avroma, pér l'istéss segment, $l' = x'_B - x'_A$, e pér j'equassion dla trasformassion i l'oma che

$$\begin{aligned} x'_B &= x_B - wt \quad \text{e} \quad x'_A = x_A - wt \quad \text{e da sì} \\ l' &= x_B - t - (x_A - wt) = x_B - wt - x_A + wt = x_B - x_A = l \end{aligned}$$

Le doe misure a saran donca istesse e sòn a dis che le longhësse a son invariante rispét a coste trasformassion.

Composission dle velocità

Da coste trasformassion a ven peui èl "**teorema dla composission dle velocità**", che as arcava sùbit derivand j'equassion dla trasformassion rispét al temp. Pér sòn, oltra a consideré sempe che $t' = t$, i butoma che :

$$V_x = \frac{dx}{dt} \quad ; \quad V_y = \frac{dy}{dt} \quad ; \quad V_z = \frac{dz}{dt} \quad \text{e che} \quad V'_x = \frac{dx'}{dt'} \quad ; \quad V'_y = \frac{dy'}{dt'} \quad ; \quad V'_z = \frac{dz'}{dt'}$$

Fasend le derivassion dite i l'oma

$$V'_x = V_x - w \quad ; \quad V'_y = V_y \quad ; \quad V'_z = V_z$$

che a peul èdcò esse butà ant la forma vетorial $\mathbf{V}' = \mathbf{V} - \mathbf{w}$.

Ant la trasformassion inversa a sarà $V_x = V'_x + w$; $V_y = V'_y$; $V_z = V'_z$, che a peul èdcò esse butà ant la forma vетorial $\mathbf{V} = \mathbf{V}' + \mathbf{w}$.

Invariansa dle lèj èd Newton

I consideroma un sistema fàit da n pont materiaj, e su ògni cobia 'd costi pont a agissa na fòrsa, che a deriva da un potensial U , che a l'ha la diression che a uniss ij doi pont e n'intensità che a dipend da la distansa dij doi pont. Sto potensial a l'é l'adission dij potensiaj U_{ik} relativ a ògni cobia.

$$U = \sum_{i=1}^n \sum_{k=i+1}^n U_{i,k}$$

e la distansa fra doi pont i e k a sarà dàita da $r_{i,k} = \sqrt{(x_i - x_k)^2 + (y_i - y_k)^2 + (z_i - z_k)^2}$

An coste condission la fòrsa che a agiss an sël pont ch'a fà i a l'avrà coma component

$$\left. \begin{aligned} f_{i,x} &= -\frac{\partial V}{\partial x_i} = \sum_{k=1}^n \frac{dV_{ik}}{dr_{ik}} \frac{x_i - x_k}{r_{ik}} \\ f_{i,y} &= -\frac{\partial V}{\partial y_i} = \sum_{k=1}^n \frac{dV_{ik}}{dr_{ik}} \frac{y_i - y_k}{r_{ik}} \\ f_{i,z} &= -\frac{\partial V}{\partial z_i} = \sum_{k=1}^n \frac{dV_{ik}}{dr_{ik}} \frac{z_i - z_k}{r_{ik}} \end{aligned} \right|_{i \neq k}$$

A l'é ciàir che ste fòrse a son a cobie uguaj e contràrie e che donca, se a son considerà tute ansema, l'arzultanta a l'é nula (as trata d'un sistema isolà). Pér ògni pont material con massa m_i a valo j'equassion diferensiaj èd Newton:

$$f_{i,x} = m_i \cdot \ddot{x}_i \quad ; \quad f_{i,y} = m_i \cdot \ddot{y}_i \quad ; \quad f_{i,z} = m_i \cdot \ddot{z}_i$$

Se adéss i passoma dal sistema d'arferiment S al sistema d'arferiment S' , i notoma che le distanse a cambio nen edonca $r_{i,k} = r'_{i,k}$, $x_i - x_k = x'_i - x'_k$, e via fòrt.

Èdcò 'l potensial V , che a dipend mach da le distanse, a cambia nen, nì coma forma nì coma valor, e coma consegensa i l'avroma che $\frac{\partial V}{\partial x_i} = \frac{\partial V}{\partial x'_i}$; $\frac{\partial V}{\partial y_i} = \frac{\partial V}{\partial y'_i}$; $\frac{\partial V}{\partial z_i} = \frac{\partial V}{\partial z'_i}$, e parèj le component dle fòrse a resto istésse. Dal moment che 'l temp a l'é istéss, èdcò le derivà sconde dle posission (acelerassion) a cambio nen.

EL PROBLEMA DIJ CAMP ELETRO-MAGNÉTICH

Fin-a a prima djë studi an sij camp eletro-magnétich, e an particolar prima djë studi 'd Maxwell (vers ël 1870), a smijava che tut a andèisa bin con costi prinsipi 'd Galiléo.

A parte da tuti ij travaj fait da arsercador coma Coulomb, Oersted, Ampére, Henry, Faraday, Gauss, che da la fin dël '700 anas a l'avio studià l'eleticità e l'magnetism, arcavand amportante lèj fisiche, Maxwell a l'ha butà ansema soe equassion che a cheuijo tuti sti arzultà ant na teoria che chièl a l'era riussì a rende coerenta. An definitiva tuti ij fenòmeno eletro-magnétich a son dëscrivù da coste equassion. I armandoma sens'autr a la session an sl'Eleticità e Magnetism (session sinch) e an particolar a la part eut ëd costa session.

L'ipòtesi 'd l'étere

J'equassion ëd Maxwell as suponìo arferìe a un sistema d'arferiment fiss rispét a n'entità considerà la séde 'd tuti ij fenòmeno eletro-magnétich, che a l'era stàita ciamà "etere".

Costa a l'era n'ipòtesi 'd travaj che a ciamava 'd trové d'equassion che a 'ndèiso bin ant un sistema d'arferiment an moviment rispét a l'étere, e tut lòn che sòn a comportava. An pì a-i era 'l problema che j'equassion ëd Maxwell a son nen invariante rispét a na trasformassion ëd Galiléo. J'equassion a dovrà cambié forma ant un sistema che as bogia rispét a l'étere, e sòn a sugerìa che as podio fé 'd misure su fenòmeno eletro-magnétich che a l'avrio dovu evidensié l'moviment d'un sistema d'arferiment rispét a l'étere.

Le trasformassion ëd Lorentz

Na còsa notà da Lorentz ant j'ani dal 1900 al 1904 a propòsit dj'equassion ëd Maxwell a l'é che coste equassion, che a son nen covariante rispét a le trasformassion ëd Galiléo, a son anvece covariante (a manten-o l'istessa forma) rispét a coste trasformassion (sempe suponend un moviment drit costant arlongh l'ass x , con velocità w , dël sistema d'arferiment S' rispét al sistema S) :

$$x' = \frac{x - wt}{\sqrt{1 - \beta^2}} \quad ; \quad y' = y \quad ; \quad z' = z \quad ; \quad t' = \frac{t - \frac{x\beta}{c}}{\sqrt{1 - \beta^2}} \quad \text{con} \quad \beta = \frac{w}{c} \quad \text{e} \quad c = \text{velocità dla lus}$$

An coste trasformassion, dite giusta "**trasformassion ëd Lorentz**", ëdcò 'l temp a càmbia ant un sistema d'arferiment an moviment. As peul noté che ste trasformassion as arduvo a cole 'd Galiléo se as supon $c = \infty$. La diferensa fra coste trasformassion e cole 'd Galiléo as arduv man man che la velocità w a dventa cita. Sta trasformassion a l'era stàita anmaginà pér dé na giustificassion a l'esperiment ëd Michelson che i vardoma sì sota, ma cand a son stàite scrivue a l'era nen ciàira la portà ëd lòn ch'a implicavo da na mira fisica, e a j'ero pitòt antérpretà coma n'artifissi matemàtich.

L'esperiment ëd Michelson

Ant ël tentativ d'arlevé 'l moviment dël sistema d'arferiment rispét a l'ipotétich étere, a l'é stàit famos cost esperiment ëd Michelison (ant ël 1879), arpetù peui da d'autri, e sempe con precision pì gròssa. L'esperiment a part da l'ipòtesi che se la lus, radiassion eletro-magnética, as propaga con soa velocità ant l'étere, ant un sistema d'arferiment terestr as dovrà misuré na velocità pì àuta cand la propagassion a l'é ant la diressiun dël moviment dla tèra ma an vers contrari, e pì bassa cand la propagassion a l'é ant la diressiun dël moviment dla tèra e ant l'istéss vers. Is arferima a figura 1, andova a-i é nö schema dl'interferòmeter pér l'esperiment midem.

Na sors luminosa S a manda un ragg ëd lus a incide su na surfassa pian-a semi-trasparenta s butà a 45° su sò përcors an posission O . su sta surfassa as divid an doi ragg, ant l'ordin OA e OB a

90° fra 'd lor, che ant ij pont *A* e *B* a son arbatù 'ndarera da doi spécc *s'* e *s''*. Tornand andarer a rivo torna an sla lastra *s* e sì as divido torna ognidun an doi ragg.




Figura 1 - Experiment èd Michelson

Ant èl canucial butà ant èl pont *C* a rivo donca ij doi ragg *SOAOC* e *SOBOC*. Ant èl pont *C* as podran vèdde ij fenòmeno d'interferensa provocà da la diferensa 'd temp butà a përcore 'l trait *OAO* e l' trait *OBO*.

As supon che la tèra as bogia con na velocità *w* rispét a l'etere e i suponoma 'd fé na prima misura con la diression *OA* ant la diression dèl vetor *w*. I ciamoma *l₁* la distansa *OA* e i disoma che, second la composition dle velocità 'd Galiléo, la velocità dla lus longh èl trait *OA* a l'é *c - w*, mentre pér torné an sël trait *AO* la velocità a l'é *c + w*.

El temp τ_1 che a-i và pér fé *OAO* antlora a val:

$$\tau_1 = \frac{l_1}{c - w} + \frac{l_1}{c + w} = \frac{l_1}{c} \left(\frac{1}{1 - \beta} + \frac{1}{1 + \beta} \right) = \frac{l_1}{c} \left(\frac{1 + \beta + 1 - \beta}{1 - \beta^2} \right) = \frac{2l_1}{c} \left(\frac{1}{1 - \beta^2} \right)$$

Dal moment che β a l'é motobin cit, as peul svilupé τ_1 an potense 'd β e fèrmésse a la sonda potensa. As oten che $\tau_1 \cong \frac{2l_1}{c} (1 + \beta^2)$. I notoma che, coma i l'oma butà prima, $\beta = \frac{w}{c}$.

Adéss i vardoma 'l temp che a-i buta la lus a përcore 'l trait *OBO*, andova i ciamoma *l₂* la distansa misurà fra *O* e *B*. A venta noté che la distansa che a ven përcorùa an efét da la lus, com a l'é illustrà an figura 2, a l'é un pòch èd pì che la distansa $2l_2$. Dal moment che 'l ragg a part da la posission *O* vers *B* al moment che l'istéss ragg a torna al pont *O*, cost a l'é spostàsse da la posission *O'* a la posission *O''*. Sto spostament, se τ_2 a l'é 'l temp èd përcorensa dèl trait *OBO*, a val $w \cdot \tau_2$.

El përcors complét *L* a val donca $L = O'B + BO'' = \sqrt{4l_2^2 + w^2 \tau_2^2}$.

Dal moment che sto përcors a ven fàit an diression, an pràctica, normal a la velocità *w*, as peul dì che 'l përcors midem a ven fàit a la velocità *c* e che donca a l'é longh $c \cdot \tau_2$. donca i scrivoma:

$$c\tau_2 = \sqrt{4l_2^2 + w^2\tau_2^2} \quad \text{che, aussà al quadrà, a dà } c^2\tau_2^2 = 4l_2^2 + w^2\tau_2^2$$

$$\tau_2^2 = \frac{4l_2^2}{c^2} + \beta^2\tau_2^2 \quad ; \quad \tau_2^2 - \beta^2\tau_2^2 = \frac{4l_2^2}{c^2} \quad ; \quad \tau_2^2 = \frac{4l_2^2}{c^2} \frac{1}{1-\beta^2}$$

$$\tau_2 = \frac{2l_2}{c} \frac{1}{\sqrt{1-\beta^2}} \quad \text{che, con l'aprossimassion com prima an dà}$$

$$\tau_2 \approx \frac{2l_2}{c} \left(1 + \frac{1}{2}\beta^2\right)$$




Figura 2 - Misura 'd Michelson. Cont èd τ_2

La diferensa dij temp èd propagassion an sij doi përcors a arzulta esse dàita da

$$\tau = \tau_2 - \tau_1 \approx \frac{2}{c} \left[l_2 \left(1 + \frac{1}{2}\beta^2\right) - l_1 \left(1 + \beta^2\right) \right]$$

e sòn a pròvoca l'interferensa che a peul esse osservà ant él pont *C*.

A sta mira as peul viré 'd 90° l'interferòmeter an manera 'd porté 'l brass *OB* ant la diression dla velocità *w*, e 'l brass *OA* ant la diression normal. An coste condission, se l'adission dle velocità a fussa rispetà, él temp èd ritard τ' a dovrà arzulté:

$$\tau' = \tau_2 - \tau_1 \approx \frac{2}{c} \left[l_2 \left(1 + \beta^2\right) - l_1 \left(1 + \frac{1}{2}\beta^2\right) \right]$$

Donca a dovrà essie nö spostament dle frange d'interferensa corispondent a la variassion dël ritard dàita da: $\Theta = \tau - \tau' \approx \frac{l_1 + l_2}{c} \beta^2$

Da sto spostament as podrà arcavé β e peui *w*.

Ma tuti j'esperiment fait an vàire condission, con la tèra an posission diferente rispét al sol, a l'han sempe dàit com arzultà che $w = 0$, comprèis j'esperiment che a dovravo la lus dël sol midema.

Da costi arzultà as podrà conclude, coma consegoensa lògica, che l'étere, vis-a-dì 'l pòst andova a càpito ij fenòmeno eletro-magnétich, a l'é solidal con la Tèra. Sta còsa che a sarà pitòst dificil da giustifiche, a portrà a na posission privilegià dla Tèra, a la mira dël sistema tolemàich èd bona a memòria. An pì, a costa conclusion as opon-o j'arzultà d'autre esperiense e d'autre osservassion che i vardoma ampressa sì sota.

Aberassion astronòmica anual

Sto fenòmeno a l'é stàit scheuvrì da Bradley ant èl 1727. Durant èl cors èd l'ann, le sèile a smija che a faso na cito elisse ant la vòlta del cel, anvece d'esse fisso. Sto fenòmeno a peul esse spiegà an manera sempia, ma bin aprossimà, da la teoria dl'emission. Is arferima a figura 3.




Figura 3 - Aberassion anual

Se \mathbf{u} a l'é un versor orientà da la stèila vers la Tèra, i l'avroma che la lus a riva an sla Tèra con costa diression, coma 'l vetor $c \cdot \mathbf{u}$. Ma la Tèra as èsposta con na velocità w_0 , e donca pér n'osservator solidal con la Tèra midema sta lus a l'é vëddùa coma 'l vetor : $c' \cdot \mathbf{u}' = c \cdot \mathbf{u} - w_0$.

Se i ciamoma φ l'àngol fait dai vetor w_0 e \mathbf{u} e i ciamoma ψ l'àngol fra \mathbf{u} e \mathbf{u}' , i podoma apliché 'l teorema dij sen al triangol TAB , e i trovoma che

$$\sin \psi = \frac{w_0}{c'} \sin \varphi$$

ma i podoma consideré che $\frac{w_0}{c'} \cong \frac{w_0}{c} = \beta$ e che ψ a l'é cit a basta da podej confonde 'l sen con l'àngol.

Donca i podoma scrive che $\psi = \beta \sin \varphi$.

An soa rivolussion antorna al Sol èl vetor w_0 , ant n'ann, a farà na rotassion èd 360° . Sòn a veul dì che 'dcò la posission dla stèila a sarà vëddùa da la Tèra a n'àngol ψ rispét a cola che a l'é soa efetiva posission, e 'l ragg èd la visual a dëscriv un còno con n'àngol 2ψ ant èl cò. La sonda part èd figura a mostra j'àngoj èd visual èd na stèila che a sia an posission tala che l'abia $\varphi = 90^\circ$, osservà an doe vire a distansa 'd ses mèis. La prima vira i l'avroma 'l ragg $S'T$ e la sonda vira il ragg $S''T$, che fra 'd lor a fan n'àngol 2ψ . Na misura sperimental èd cost àngol a dà $41''$.

Ma se a fussa che l'ètere a l'é solidal con la Tèra, com as podrìa deduve da l'esperienza 'd Michelson i dovrìo avèj che $w_0 = 0$ (ètere che a viagia ansema a la Tèra) e donca $\psi = 0$. L'arzultà dla misura sperimental a l'é anvece precis se as supon l'arferiment assolut fiss rispét al Sol.

Esperiensa 'd Fizeau

I acenoma giusta a costa esperienza, faita pér serché 'd trové un sistema d'arferiment pér j'equassion èd Maxwell. L'esperient a serca dë stabili se 'l supòst ètere a sia solidal con èl mojen andova as verificà la propagassion. Un-a dle forme 'd cost esperiment (pensà da Zeemann) a l'é arpresentà an figura 4,




Figura 4 - Esperienda 'd Fizeau.

Na sors èd lus S a manda un ragg a 45° an 's na lastra L semi-arbatenta, che a divid èl ragg an doe part, dont la prima a fa 'l përcors L_1, T_1, A, B (*travers èl prisma P*) T_2, L_2, L, O , mentre la sonda a fa 'l përcors L_2, T_2, B, A (*travers èl prisma P*) T_1, L_1, L, O . Ij doi përcors a son longh istéss e an O as osserva l'interferensa dij doi ragg, se un dij doi a l'ha fait èl përcors con na velocità w , an diressione opòsta. Èl prim ragg a viagia ant ij tubo con l'istéssa diressione èd l'aqua, mentre lè scond ragg a traversa ij tubo "contra-corent".

An efét, butand l'aqua an moviment, as peul osservé nè spostament dle frange d'interferensa, ma nen corispondent a l'ipòtesi che l'étere a viagia con l'aqua. Un rabastament parsial, com as podrìa deduve, a cobia nen con l'esperienda 'd Michelson.

An conclusion

Se as pijo pér bon-e le trasformassion èd Galiléo da apliché a sistema d'arferiment an moviment droit costant fra 'd lor (comprèisa l'esistensa d'un temp universal), e as serca n'arferiment pér la sede dij fenòmeno eletro-magnétich, ciamà étere, tuti j'esperient fàit pér studié st'étere a pòrto a 'd conclusion che a son sempe contraditòrie.

A sta mira ò as consideravo "nen giuste" j'equassion èd Maxwell, ma sòn a l'era nen possibl, dal moment che coste equassion a j'ero bin verificà e nen criticàbij ant la sostansa, opura a ventava atribui a sto "étere" carateristiche diferente da na situassion a l'àutra, cosa pitòst dròla pér n'entità fisica.

A-i era quaicòs che a lassava nen sodisfàit, e a ventava trové n'àutra dëscription che a podèissa fé sté ansema tut lòn che a l'era stàit èstudià e che a smijava giust. A ventava 'dcò trové na giustificassion a j'arzultà dj'esperient, che a cobiavo nen con la teoria, ma che a podio nen esse considerà sbalià.

Pàgina lassà veuida apòsta

IJ PRINSÌPI 'D RELATIVITÀ STRÈITA

An costa situassion, ant él 1905, Einstein a pùblica sò travaj, andova a pòrta soe conclusion an sël problema. Pér Einstein a ventava arvèdde tuti ij prinsìpi e postulà dla Física, a parte da la Mecànica, comprèis, e pì che tut, ij prinsìpi che a portavo a le trasformassion éd Galiléo.

La relatività d'Einstein

Prima 'd tut Einstein a estend a tuta la Física él prinsìpi 'd relatività che Galiléo a arferìa a la Mecànica. Sò prinsìpi a dis che tuti ij sistema inersiaj a son echivalent pér la formulassion éd tute le lèj fisiche, e un éd costi a peul nen esse distint da n'àutr con d'esperiment fisich. Donca 'dcò ij fenòmeno eletro-magnétich a venta ch'a sio comprèis, e nen mach, ma 'dcò ij fenòmeno anlià ai camp éd fòrse d'interassion nuclear, che a son nen eletro-magnétich.

Se sòn a l'é vèra, antlora 'l concé d'etere a dventa un concé inùtil, dal moment che, se a esistèisa, a sarà nen possibl individuoé un sò moviment rispét a d'àtri sistema inersiaj, e donca a sarà franch coma che a-i fussa nen.

El prinsìpi d'Einstein a fà nen arferiment a un sistema "rispét a le stèle fisse", ma a carateristiche proprie dël sistema.

Obiession a la relatività 'd Galiléo

I l'oma vist che tut él problema a ven da la nen compatibilità dj'equassion éd Maxwell con la relatività éd Galiléo. I l'oma 'dcò dit che a-i son nen rason bon-e pér nen aceté j'equassion éd Maxwell, e parèj Einstein a l'ha pensà che a j'ero le trasformassion éd Galiléo a dovèj esse modifìcà.

Lòn ch'a l'é stait butà an discussion a l'é la ressiprossità dël moviment e l'esistensa d'un temp absolut, che a son j'ipòtesi éd Galiléo. An costa manera Einstein a riva a la conclusion che a venta lassé perde l'idèja d'un temp absolut, contut che la cosa, dàita nòstra esperiensa, a smija pitòst dròla.

An efét, pér definì un temp universal che a vala pér tuti ij sistema inersiaj, a venta prima definì còs as intend pér "*event simultani*" e, second ij prinsìpi dla Física, definì sòn a veul dì definì 'dcò na manera pér misuré la simultanità éd doi event. Ant la Física 'd prima as podìa dì che doi event a j'ero simultani, sensa considerassion an sij sistema d'arferiment. Ma a venta ten-e cont dël prinsìpi che ant la Física a peulo intré an geugh mach cole grandësse che a peulo esse definìe travers la manera d'osservéje e 'd misuréje.

Se ij doi event A e B a càpito ant l'istéss pòst, as peul trové la manera 'd verifiché se a càpito ant l'istéss temp, con vaire técniche. Ma se ij doi event a càpito an posission distante fra 'd lor, pér verifiché la simultanità éd doi event, l'ùnica manera a l'é cola che ij doi event a mando un segnal vers un dispositiv ed verifica. Se sto segnal a podèisa viagé a velocità anfinìa, a-i sarà gnum problema, ma as conòsso nen segnaj che a l'àbio costa carateristica, e qualonque segnal ha l'ha sempe un temp éd propagassion.

Pér soe carateristiche, a smija che la lus a sia la manera la pì adata a trasmëtte sti segnaj, pérchè soa velocità, che a l'é la pì àuta ch'as conòssa, a l'é la manch condissionà da event e condission esterne. Prima d'arpié 'l discors an sla simultanità, vardoma antlora quàich considerassion an sla propagassion dla lus.

Propagassion dla lus

An prinsìpi, ant la teorìa 'd Maxwell, la lus a l'era dëscrivùa coma na përturbassion che as propagava pér onde, ant un mojen stàtich e transparent, che as trovava daspërtut, e che a l'era stait ciamà "etere".

I l'oma vist väire esperiment che a sércavo 'd buté an evidensa un moviment fra étere e sistema d'arferiment. Coma conseqoensa a smijava che as rivèissa nen a evidensié na dipendensa fra la velocità dla lus e 'l sistema d'arferiment andova sta velocità a l'era misurà, e gnanca fra la velocità dla lus e 'l moviment d'osservator ò dla midema sors luminosa.

A sta mira Einstein a fòrmula st'ipòtesi: " *Ij segnaj luminos as propago, ant èl veuid, an riga drita, an tute le diressiun e con na velocità c costanta, e sòn an tuti ij sistema inersiaj* ". La velocità misurà al moment a l'era $c = 2,997930 \cdot 10^{10} \text{ cm/s}$.

Sòn a dis èdcò che la velocità dla lus a dipend nen da la velocità dla sors, còsa che a l'é stàita verificà an diverse manere (andiréte). Natural che costa a l'é n'afermation che a l'é fòra da nòstra experiensa e a peul nen esse derivà da na teoria ondulatària ò corpuscolar da lus.

Simultanità "relativa"

I arpijoma la costion dla simultanità èd doi event, dòp j'afermation ch'i l'oma fait an sla propagassion dla lus. Prima dla relatività as suponìa che la decision an sèl fait che doi event a fusso ò a fusso nen contemporani a l'era sempe l'istessa an tuti ij sistema an manera indipendenta da sò moviment.

A sta mira dj'ipòtesi fàite, na decision an sla simultanità èd doi event che a càpito nen ant l'istess pòst a peu esse formulà an costa manera.

Doi event P e Q che as produvo an doi pont P e Q d'un sistema inersial S a son simultani se, e mach se, le lus emëttue dai doi pont al verifichësse dl'event a rivo ant l'istess moment ant èl pont medi M dèl segment PQ ant èl sistema S .

Dàita costa definission, antlora i consideroma doi sistema d'arferiment inersiaj S e S' . I suponoma che doi event P e Q as verificò ant ij pont P e Q dèl sistema S . Sti doi pont a corispondò ai pont P' e Q' dèl sistema S' . Is arferima a figura 5.




Figura 5 - Simultanità an doi sistema an moviment

Dai doi pont P e Q dèl sistema S a parto doi segnaj luminos che as propago vers èl pont central dèl segment PQ , ma antant èl sistema S' as èspòsta con na dàita velocità rispèt al sistema S , e cand ij doi segnaj a rivo, ansema, al pont M dèl sistema S , èl pont M' dèl sistema S' a coincid pì nen con èl pont M dèl sistema S . Dal moment che ij doi segnaj a peulo nen ancontrésse tant ant M che ant M' , sòn a veul dì che pèr èl sistema S ij doi event P e Q a son simultani, ma sòn a l'é nen vera pèr n'osservator ant èl sistema S' .

Se i suponoma che doi pont a sio ferm l'un rispèt a l'àutr, e a na distansa l conossùa, a l'é possibil sincronisé doe mostre ant ij doi pont. Al temp t_1 na mostra a manda un segnal a l'àutra, e sto segnal a sincronisa l'àutra al temp $t_1 + l/c$. Se le mostre a son an moviment l'un-a rispèt a l'àutra, antlora la còsa a dventa bin pì complicà, e i la vèddroma magara peui.

Le trasformassion èd Lorentz

I l'oma già acenà che ant èl 1904 Lorentz a l'avìa publicà 'd trasformassion che a fasò che j'equassion èd Maxwell a fusso covariante. An coste trasformassion èdcò 'l temp a cambia passand da un sistema a n'àutr an moviment, e adéss costa ipòtesi a ven acetà. Arpijoma donca la costion a parte da le doe ipòtesi d'Einstein: - 1) - costansa dla velocità dla lus. - 2) - resiprossità dèl moviment.

I notoma che, coma pér le trasformassion éd Galiléo, dal moment che an doi sistema inersiaj S e S' a val él prinsipi d'inèrsia, le stesse considerassion ch'i l'oma fàit prima a propòsit éd cole trasformassion adéss an pòrto a dì che le relassion fra x, y, z, t e x', y', z', t' a devo esse fonsion linear dël tipo:

$$\begin{cases} x' = a_{11} x + a_{12} y + a_{13} z + a_{14} t \\ y' = a_{21} x + a_{22} y + a_{23} z + a_{24} t \\ z' = a_{31} x + a_{32} y + a_{33} z + a_{34} t \\ t' = a_{41} x + a_{42} y + a_{43} z + a_{44} t \end{cases}$$

Se peui i suponoma che ij doi sistema as bogio l'un an 's l'autr con na traslassion arlongh l'ass x e che a un dàit temp inissial j'ass dij doi sistema a coincido (ipòtesi già fàite prima) e i arpetoma j'istésse considerassion fàite prima an 's j'ass y e z , i trovoma sùbit che ste trasformassion as arduvo a

$$x' = \mu(+w)(x - wt) ; \quad x = \mu(-w)(x' + wt')$$

$$y' = y ; \quad z' = z$$

Ma se i butoma $x = -x$ e $x' = -x'$, vis-a-dì che i consideroma j'ass x e x' orientà ant l'autr sens, se prima S' a traslava rispét a S con velocità w , adéss a l'é S che a trasla rispét a S' con l'istéssa velocità w . Da sòn as deduv che a venta ch'a sia $\mu(-w) = \mu(w)$, pròpi coma prima.

Dal sistema dle doe equassion $x' = \mu(w)(x - wt)$; $x = \mu(w)(x' + wt')$ i podoma arcavé t' che a sarà (i scrivoma giusta μ intendend $\mu(w)$):

$$t' = \frac{x}{\mu w} - \frac{x'}{w} = \frac{x}{\mu w} - \frac{1}{w}(\mu x - \mu w t) = \frac{x}{\mu w} - \frac{\mu x}{w} + \mu t = x \frac{1}{w} \left(\frac{1}{\mu} - \mu \right) + \mu t$$

$$\text{e se i butoma } f(w) = \frac{1}{w} \left(\frac{1}{\mu(w)} - \mu(w) \right) \text{ i otnoma}$$

$$t' = f(w)x + \mu(w)t$$

As trata antlora 'd calcolé lòn ch'a val $\mu(w)$. Pér fé sòn i dovroma 'l prinsipi dla costansa dla velocità dla lus. Sempe considerand che ij doi sistema d'arferiment S e S' a coincido a un temp $t = 0$, i suponoma che an sto temp un ragg luminos a parta da l'origìn comun $O = O'$ dij doi sistema.

Dòp in temp che a sarà t ant S e t' ant S' , pér él prim sistema la lus a l'é rivà ai pont éd la surfassa sférica con ragg $c t$ e pér lè scond ai pont éd la surfassa sférica con ragg $c t'$.

A l'istéss moment a venta doncà ch'a valo le doe equassion:

$$x^2 + y^2 + z^2 - c t = 0 ; \quad x'^2 + y'^2 + z'^2 - c t' = 0$$

e se i consideroma giusta j'intersession dla sféra con l'ass x i l'avroma:

$$x^2 - c^2 t^2 = 0 ; \quad x'^2 - c^2 t'^2 = 0$$

Da la prima 'd coste equassion as arcava che $x = c t$; $x = -c t$. Arpijoma antlora j'espression ch'i l'oma vist prima $x' = \mu(x - wt)$ e $t' = f x + \mu t$, i dovroma pér x ij valor sì dzora e i scrivoma

$$x'^2 - c^2 t'^2 = 0$$

$$\mu^2 (ct - wt)^2 - c^2 (f \cdot ct + \mu t)^2 = 0 \quad \text{e, portand fòra } t^2 :$$

$$[\mu^2 (c - w)^2 - c^2 (f \cdot c + \mu)^2] t^2 = 0 \quad \text{e da l'autra solussion as arcava :}$$

$$[\mu^2 (c + w)^2 - c^2 (f \cdot c - \mu)^2] t^2 = 0$$

Coste doe equassion a venta che a valo pér qualonque valor éd t , e doncà a venta ch'a sio a zero ij coeficent dla variàbil t^2 . Vis-a-dì:

$$\begin{aligned}\mu^2(c-w)^2 - c^2(f \cdot c + \mu)^2 &= 0 \\ \mu^2(c+w)^2 - c^2(f \cdot c - \mu)^2 &= 0\end{aligned}$$

Se i sotraoma member a member ste doe equassion, fàite le semplificassion i otnoma che $\mu^2 w + c^2 f \mu = 0$

Se i andoma a sostituì l'espression ch'i l'oma scrivù pér la f i otnoma:

$$\begin{aligned}\mu^2 w + c^2 \left[\frac{1}{w} \left(\frac{1}{\mu} - \mu \right) \right] \mu &= 0 \\ \mu^2 w^2 - \frac{c^2}{w} (1 - \mu^2) &= 0\end{aligned}$$

I pijoma mach la solussion positiva, vist che x e x' a l'han l'istéss vers, e i otnoma che

$$\mu = \frac{1}{\sqrt{1-\beta^2}} \text{ andova } \beta = \frac{w}{c}$$

A sta mira i podoma 'dcò esplicité 'l valor èd $f(w)$ che a sarà:

$$f(w) = \frac{1}{w} \left(\frac{1}{\mu(w)} - \mu(w) \right) = \frac{1}{w} \left(\sqrt{1-\beta^2} - \frac{1}{\sqrt{1-\beta^2}} \right) = \frac{1}{w} \left(-\frac{\beta^2}{\sqrt{1-\beta^2}} \right) = -\frac{\beta}{\sqrt{1-\beta^2}}$$

Da tut lòn ch'i l'oma vist as peul torné 'ndarera a nòstre trasformassion, sempe ant l'ipòtesi (nen limitativa, macassia) che 'l moviment dij doi sistema a sia na traslassion arlongh l'ass x , con sistema coincident al temp 0, e i trovoma cole ch'a son ciamà le "**Trasformassion èd Lorentz**":

$$x' = \frac{x - wt}{\sqrt{1-\beta^2}} \quad ; \quad y' = y \quad ; \quad z' = z \quad ; \quad t' = \frac{t - \frac{\beta}{c} x}{\sqrt{1-\beta^2}} \quad \text{andova} \quad \beta = \frac{w}{c}$$

Pér l'idèja 'd relatività che i voroma antroduve ambelessì, costa trasformassion a basta, ma i notoma che costa a ven dita "*trasformassion special èd Lorentz*", mentre la trasformassion general a l'é motobin pì complicà (a includ rotassion e via fòrt).

Le trasformassion inverse as peulo oten-e arzolvend èl sistema an x, y, z, t , opura giusta scambiand x, y, z, t , con x', y', z', t' e w con $-w$, dàita la resiprossità dël moviment. As oten:

$$x = \frac{x' + wt}{\sqrt{1-\beta^2}} \quad ; \quad y = y' \quad ; \quad z = z' \quad ; \quad t = \frac{t' + \frac{\beta}{c} x'}{\sqrt{1-\beta^2}}$$

Coste trasformassion a son compatibij con la teoria d'Einstein, e an efét Einstein a sugeriss èd consideré coste trasformassion al pòst èd cole 'd Galiléo. I l'oma dësgìà acenà che coste trasformassion a dvento cole 'd Galiléo se as considera che as peussa buté $c = \infty$, vis-a-dì se as pensa che un segnal, pr'esempi luminos, as propaga an manera istantània.

As peul vëdde 'dcò che pér velocità motobin pì cite 'd cola dla lus, l'aprossimassion portà da le trasformassion èd Galiléo a peul esse trascurà sensa che la còsa a fasa quàich diferensa sensìbil, èdcò con calcoj motobin precis.

I vëddroma pì anans èd quantifiché costa aprossimassion, dòp avèj vist cole ch'a son le consegoense che a ven-o da l'adoté costi prinsìpi e coste trasformassion.

Consegoense

I vardoma adéss còs a compòrta l'adoté le trasformassion èd Lorentz (e donca ij prinsìpi che a l'han prodovùje) a còse sempie coma la misura èd na longhëssa, opura èd n'interval èd temp an doi

sistema inersiaj an moviment fra 'd lor. I suponoma sempe nòstr modèl simplificà èd doi arferiment che a scoro an s'ass x , e con le doe trien-e che a coincido a un dàit moment.

Misura 'd longhëssa

Dàit ij sòlit arferiment S e S' , i suponoma che, solidal con l'arferiment S' a-i sia na sbara paraléla a l'ass x dont i voroma misuré la longhëssa l .

Ant l'arferiment S' a l'é ciàir che se x'_A e x'_B a son le coordinò dj'estrem dla sbara férma, a basta fé $l' = x'_B - x'_A$, e costa a sarà la longhëssa dla sbara misurà an S' .

Ant l'arferiment S la sbara as ved score, e pér misuréla a venta, a un dàit instant e an manera contemporania, arlevé soe coordinà x_A e x_B , e conté la longhëssa l dla sbara coma $l = x_B - x_A$ e costa a sarà la longhëssa dla sbara misurà an S .

Se i vardoma le fòrmule 'd trasformassion, e i aplicoma 'l procediment ch'i l'oma dovrà pér dimostré che ant le trasformassion èd Galiléo la longhëssa a càmbia nen, i podoma vèdde che a valo j'espression:

$$x'_A = \frac{x_A}{\sqrt{1 - \beta^2}} \quad ; \quad x'_B = \frac{x_B}{\sqrt{1 - \beta^2}} \quad \text{e donca} \quad x'_A = \frac{x_A}{\sqrt{1 - \beta^2}} \quad ; \quad x'_B - x'_A = \frac{x_B - x_A}{\sqrt{1 - \beta^2}}$$

e da sì a arzulta sùbit che $l = l' \sqrt{1 - \beta^2}$.

Donca l'arzultà ch'as oten a l'é bin pòch intuitiv e a dis che na sbara an moviment ant èl sens èd soa longhëssa a l'é pì curta dla sbara midema misurà da férma. Se la sbara a l'é orientà arlong l'ass y ò l'ass z , anvece, soa longhëssa a càmbia nen.

I podoma comensé a fésse n'idèja an s'l'aprossimassion ch'i l'oma dit prima. I suponoma na velocità èd $40'000 \text{ km/h}$, che a peul esse cola èd na càpsula slansà ant lë spassi. Sòn a corispond a pì ò manch $11'111 \text{ m/s}$. Pér la velocità dla lus i pijoma $299.792.458 \text{ m/s}$, e parej i trovoma che $\beta = 3,7 \cdot 10^{-5}$ e donca $\beta^2 = 1,37 \cdot 10^{-9}$. èl fator èd ridussion a val $0,999999999315$. Na sbara d'un meter as arduv èd $0,315 \text{ milionésim èd milim}$.

Misura èd n'interval èd temp

Sempe ant le condission èd prima i suponoma che ant èl sistema S' doi event A e B a càpito ant l'istéss pont, che i pijoma coma origin dèl sistema S' . I disoma che A a càpita al temp 0 e che B a càpita al temp τ' .

Pér l'event A i l'oma $x'_1 = 0$; $t'_1 = 0$

Pér l'event B i l'oma $x'_2 = 0$; $t'_2 = \tau'$

A l'é ciàir che l'interval fra A e B , coma misurà an S' , a val τ' .

Se i vardoma lòn ch'as misura an S , andova ij doi evenuta a càpito ant un pont ch'a bogia, i l'avroma, suponend che 'l prim event a càpita ant èl temp 0 èdcò pér èl sistema S ,

$$t_1 = \frac{t'_1 + \frac{\beta}{c} x'_1}{\sqrt{1 - \beta^2}} = 0 \quad ; \quad t_2 = \frac{t'_2 + \frac{\beta}{c} x'_2}{\sqrt{1 - \beta^2}} = \frac{\tau'}{\sqrt{1 - \beta^2}} \quad \text{e donca} \quad t_2 - t_1 = \tau = \frac{\tau'}{\sqrt{1 - \beta^2}}$$

Ant un sistema an moviment donca 'l temp a l'é pì longh, ant èl sens che la distansa temporal fra un prinsipi e na fin èd n'istéss fenòmeno a ven misurà pì longa da n'osservator an moviment rispét al pont andova 'l fenòmeno a càpita.

Considerassion su coste conclusion

I foma doi esempi, un pér le longhësse e l'autr pér ij temp, che a mostro coma sta contrassion dle longhësse e sto dilatament dij temp a son anlià al concèt èd simultanità com i l'oma dëscutulo prima.

Longhësse

Suponoma d'avéj doe aste AB e $A'B'$ che a l'arpòs a sio longhe istésse, e na terza asta 'd misura che i podoma ciamé M . Coma sempe i consideroma le tre aste paralele fra 'd lor e paralele a l'ass x dël rispetiv sistema d'arferiment.

Disoma peui che AB a l'é solidal con un sistema d'arferiment S , mentre $A'B'$ a l'é solidal con un sistema S' , mentre M a l'é solidal con un sistema S'' che sì i consideroma coma l'arferiment ferm. Is arferima a figura 6.




Figura 6 - Misura 'd longhëssa d'un segment

I sistema S e S' a viagio an diression opòste con l'istéssa velocità, e as ancontro a l'autëssa dël régol M , andova a l' possibl misuré la distansa fra ij pont andova as ancontro ij doi estrem A, A' e ij doi estrem B e B' . Ant èl sistema ferm S'' , pér rason èd simetria, j'ancontr dij doi estrem A con A' (event \mathcal{A}) e dij doi estrem B con B' (event \mathcal{B}) a son doi event simultani.

I suponoma che l'ancontr a sia segnalà da doi segnaj luminos, e che an sël régol M as registro le posission spassiaj A''' e B''' dij pont d'ancontr. Ij doi segnaj a rivran giusta ant èl pont sentral dla distansa $A'''B'''$. Da lòn ch'i l'oma dit prima a propòsit èd simultanità, a arzulta anvece che ant l'arferiment S as misura che $A'B'$ a l'é pì curt che AB , dal moment che l'event \mathcal{A} a precéd l'event \mathcal{B} e, al contrari ant l'arferiment S' i l'oma che AB a l'é pì curt che $A'B'$ dal moment che l'event \mathcal{B} a precéd l'event \mathcal{A} .

Temp

I vardoma adéss na misura relativistica dël temp. I consideroma un còrp C che as bogia an manera paraléla rispét a un còrp C' , con na velocità relativa v . I pijoma ij sòlit doi sistema d'arferiment S e S' , dont èl prim a sia solidal con C e lë scond con C' . I consideroma coma ferm èl sistema S' . Is arferima a figura 7.




Figura 7 - Misura relativistica 'd temp

I suponoma che ant ij pont A, B, C dël còrp C , che rispét al sistema d'arferiment S a l'han coordinà $-d, 0, +d$, al temp $t = 0$ a càpito tre event simultani. Ant ël sistema S' , solidal con ël còrp C' , sti tre event a saran pì nen simultani, ma a capitran, second lòn ch'i l'oma vist, ai temp:

$$t'_A = \frac{\beta \frac{d}{c}}{\sqrt{1 - \beta^2}} ; \quad t'_B = 0 ; \quad t'_C = -\frac{\beta \frac{d}{c}}{\sqrt{1 - \beta^2}}$$

Se dòp un temp τ a càpita torna na série d're event contemporani, sempe ant ij pont A, B, C dël còrp C , ant ël sistema S' i l'avroma torna che 'l temp èd costi event a l'é misurà coma:

$$\theta'_A = \frac{\tau + \beta \frac{d}{c}}{\sqrt{1 - \beta^2}} ; \quad \theta'_B = \frac{\tau}{\sqrt{1 - \beta^2}} ; \quad \theta'_C = \frac{\tau - \beta \frac{d}{c}}{\sqrt{1 - \beta^2}}$$

J'intervaj èd temp fra la prima e la sonda série d'event a saran:

$$\theta'_A - t'_A = \theta'_B - t'_B = \theta'_C - t'_C = \frac{\tau}{\sqrt{1 - \beta^2}}$$

d'acòrdi con lòn ch'i l'oma vist prima a propòsit dla dilatassion dij temp.

I podoma adéss supon-e che j'event, a parte da n'istant $t' = 0$, a càpito contemporani su C' , solidal con S' , ant ij pont A', B', C' . A sta mira i l'oma che 'l sistema S a l'ha na velocità relativa èd -v rispét a S' . J'event a saran vist ai temp:

$$t_A = -\frac{\beta \frac{d}{c}}{\sqrt{1 - \beta^2}} ; \quad t_B = 0 ; \quad t_C = \frac{\beta \frac{d}{c}}{\sqrt{1 - \beta^2}}$$

Coma prima i consideroma che dòp un temp $t' = \tau$ a càpita n'àutra serie d'event contemporani, ant ij pont A', B', C' . Costi event , ant ël sistema S , a son osservà ai temp:

$$\theta'_A = \frac{\tau - \beta \frac{d}{c}}{\sqrt{1 - \beta^2}} ; \quad \theta'_B = \frac{\tau}{\sqrt{1 - \beta^2}} ; \quad \theta'_C = \frac{\tau + \beta \frac{d}{c}}{\sqrt{1 - \beta^2}}$$

J'intervaj èd temp fra la prima e la sonda série d'event a saran ancora sempe:

$$\theta_A - t_A = \theta_B - t_B = \theta_C - t_C = \frac{\tau}{\sqrt{1 - \beta^2}}$$

I disoma, sensa arporté j'esperiment, che coste relassion a l'han na conferma sperimental.

Cinemàtica relativistica

I vardoma sì 'l problema dla composission dle velocità, com i l'avio già vist ant ël cas dle trasformassion èd Galilèo.

I consideroma che un pont as bogia con velocità v rispét al sistema S e con velocità v' rispét al sistema S' , che a soa vira as bogia a la velocità w rispét al sistema S . I osserovma che le component dla velocità ant ij doi sistema a saran, second soa definission, le derivà prime rispét al temp dle coordinà dël pont midem. Vis-a-dì:

$$\begin{aligned} v_x &= \frac{dx}{dt} ; \quad v_y = \frac{dy}{dt} ; \quad v_z = \frac{dz}{dt} \\ v'_x &= \frac{dx'}{dt'} ; \quad v'_y = \frac{dy'}{dt'} ; \quad v'_z = \frac{dz'}{dt'} \end{aligned}$$

I píjoma, coma sempe, j'ass x e x' ant la diressió dla velocità \vec{w} . I scrivoma antlora ij diferensiaj dle coordinà e dël temp dël sistema S ant le coordinà dël sistema S' .

$$dx = \frac{dx' + \vec{w} dt'}{\sqrt{1 - \beta^2}} ; \quad dy = dy' ; \quad dz = dz' ; \quad dt = \frac{dt' + \frac{\beta}{c} dx'}{\sqrt{1 - \beta^2}}$$

e a sta mira i podoma scrive le derivà che a dàn v_x , v_y , v_z , dividend dx , dy , dz pér dt .

$$\begin{aligned} \frac{dx}{dt} &= \frac{dx' + \vec{w} dt'}{dt' + \frac{\beta}{c} dx'} = \frac{\frac{dx'}{dt'} + \vec{w}}{1 + \frac{\beta}{c} \frac{dx'}{dt'}} \\ \frac{dy}{dt} &= \frac{dy'}{dt' + \frac{\beta}{c} dx'} \sqrt{1 - \beta^2} = \frac{\frac{dy'}{dt'} \sqrt{1 - \beta^2}}{1 + \frac{\beta}{c} \frac{dx'}{dt'}} \\ \frac{dz}{dt} &= \frac{dz'}{dt' + \frac{\beta}{c} dx'} \sqrt{1 - \beta^2} = \frac{\frac{dz'}{dt'} \sqrt{1 - \beta^2}}{1 + \frac{\beta}{c} \frac{dx'}{dt'}} \end{aligned}$$

Donca i podoma scrive:

$$v_x = \frac{v'_x + \vec{w}}{1 + \frac{\beta}{c} v'_x} ; \quad v_y = \frac{v'_y \sqrt{1 - \beta^2}}{1 + \frac{\beta}{c} v'_x} ; \quad v_z = \frac{v'_z \sqrt{1 - \beta^2}}{1 + \frac{\beta}{c} v'_x}$$

Pér j'equassion inverse a venta ten-e cont èd na velocità negativa $-w$ rispét a prima, e donca:

$$v'_x = \frac{v_x - \vec{w}}{1 - \frac{\beta}{c} v_x} ; \quad v'_y = \frac{v_y \sqrt{1 - \beta^2}}{1 - \frac{\beta}{c} v_x} ; \quad v'_z = \frac{v_z \sqrt{1 - \beta^2}}{1 - \frac{\beta}{c} v_x}$$

I podoma noté che, componend le velocità, nen mach la component ant la diressió dël moviment dij sistema a càmbia, ma 'dcò j'autre doe.

I podoma 'dcò scrive la relassion che a-i é fra ij mòduj dle velocità d'un còrp móbil coma viste an doi sistema d'arferiment S e S' . I scrivoma antlora l'espression:

$$c^2 - v_x^2 - v_y^2 - v_z^2 = \frac{1 - \beta^2}{\left(1 + \frac{\beta}{c} v'_x\right)^2} \left(c^2 - v'^2_x - v'^2_y - v'^2_z \right)$$

e considerand ij mòduj dle velocità as oten

$$\sqrt{1 - \frac{v^2}{c^2}} = \frac{\sqrt{1 - \beta^2}}{1 + \frac{\beta}{c} v'_x} \sqrt{1 - \frac{v'^2}{c^2}}$$

I notoma a sta mira coma la velocità dla lus a sia na velocità lìmit. Se an efét i suponoma che la velocità dël pont an diressió x' rispét a S' a sia $v'_x = c$, e che a sia 'dcò $w = c$. la velocità v_x a

$$\text{arzulta sempe } v_x = \frac{c + c}{1 + \frac{c^2}{c^2}} = \frac{2c}{2} = c$$

Sòn as ved èd cò dal fàit che se w a fussa $w > c$ i l'avriù che la quantità $\sqrt{1 - \beta^2}$ a dventrà anmaginària.

Cronotòpo ò spassi-temp

Costa a l'é na manera geométrica dë studié ij fenòmeno relativistich, che a l'é stàita antrodonvùa da Minkowski.

As considero le quat variàbij x, y, z, t coma le coordinà èd nè spassi a quat dimension. Ògni pont an sto spassi a arpresenta un "**pont cronotòpic**" opura un "**event elementar**", e lè spassi midem a ven ciamà "**cronotòpo**" opura "**spassi-temp**". A l'é ciàir che na rapresentassion gràfica an general, a sta mira, a dventa un problema (as peul fé se as pensa a moviment mach arlongh a un-a ò doe diression).

Ant lè spassi ordinari mentre un pont as èspòsta a càmbio soe coordinà mentre 'l temp a càmbia. Ant le spassi-temp la storia cinemàtica dël pont a l'é arpresentà da la sucession èd soe posission, che a formo na "lìnia cronotòpica".

L'inclinassion èd costa lìnia, rispét a l'ass t , dàta da le derivà $\frac{dx}{dt}, \frac{dy}{dt}, \frac{dz}{dt}$ che a son fonsion èd t , a dà a ògni moment la velocità dël pont.

Un pont a passa a na posission davzin-a travers increment infinitésim èd soa posission, vis-a-dì con j'increment dx, dy, dz, dt . As definiss "*quadrà dl'element linear*" dël cronotòpo la forma diferensial $ds^2 = c^2 dt^2 - dx^2 - dy^2 - dz^2$.

Metod geométrich an doe dimension (x, t)

Is butoma ant un cas semplici, andova i podoma 'ncora dovré na rapresentassion gràfica. I suponoma, an efét, d'avèj un pont material che a viagia arlongh l'ass x , mentre soe coordinà y e z a resto costante e uguaj a zero. Anvece dlè spassi-temp a quat dimension i podoma consideré mach èl pian xt pér describe nòstr moviment.

A ven còmod consideré coma variàbil $\theta = c t$ anvece che la vatiàbil t , (an costa manera an dij doi ass a-i son longhèsse), e peui supon-e che le scale an sij doi ass a sio j'istesse.

A l'é ciàir che sto pian $x\theta$ a l'é nè spassi-temp, dont ògni pont a arpresenta un "*pont-event*". Is arferima a figura 8




Figura 8 - Spassi-temp pér un pont an sl'ass x

Is butoma ant un cas sempi, andova i podoma 'ncora dovré na rapresentassion gràfica. I suponoma, an efét, d'avèj un pont material che a viagia arlongh l'ass x , mentre soe coordinà y e z a resto costante e uguaj a zero. Anvece dlè spassi-temp a quat dimension i podoma consideré mach èl pian xt pér describe nòstr moviment.

A ven còmod consideré coma variàbil $\theta = c t$ anvece che la vatiàbil t , (an costa manera an dij doi ass a-i son longhèsse), e peui supon-e che le scale an sij doi ass a sio j'istesse.

El moviment dël pont a sarà arpresentsà da na llinia oraria an sto pian $x\theta$. I l'oma vist che la velocità dla lus a l'é un lìmit, e donca pér che un pont as bogia arlongh l'ass x a velocità inferior a c a venta che a sia sodisfàta la condission:

$$\left| \frac{dx}{d\theta} \right| = \left| \frac{1}{c} \frac{dx}{dt} \right| < 1$$

Sòn a dis che la tangent a la llinia orària ant un pont qualunque a venta che a fasa n'àngol con l'ass θ pì cit èd 45° . Un segnal che as propaga a la velocità dla lus an sl'ass x , ant un sens ò ant l'àutr, partend da $x = 0$ al temp $t = 0$, a l'é arpresentsà dai pont dla llinia $x - \theta = 0$ (an sens positiv) o dai pont dla llinia $x + \theta = 0$ (an sens negativ). A l'é ciàir che qualunque llinia orària che a passa pér l'origin O a dovrà resté ant lë spassi, antorna a l'ass θ , limità da le llinie $x - \theta = 0$ e $x + \theta = 0$.

Se \mathcal{O} e \mathcal{P} a son doi event dla stessa llinia drita 'd lus, vis-a-dì la llinia che a arpresents la propagassion d'un segnal luminos ch'i l'oma vist prima, e \mathcal{O} a corispond a la patensa dël segnal dal pont $x = 0$ al temp $t = 0$, èl pont \mathcal{P} a arpresents 'l passagi dël segnal ant èl pont x corispondent a soa assissa, al temp t corispondent a soa ordinà. Sto pont a sarà an sla llinia $x - \theta = 0$.

Le doe llinie $x - \theta = 0$ e $x + \theta = 0$ a divido 'l pian an tre zòne, dont la prima a l'é cola comprèisa antorna a l'ass θ positiv, e a l'é dita cola dël **futur fisich**, che a comprend tuti ij pont che as peulo ragiunge da l'origin con pont (segnaj) che as bogio a velocità inferior a cola dla lus (èl lìmit a l'é dàit da le doe righe drite). La sonda a l'é cola comprèisa antorna a l'ass θ negativ, e a l'é dita cola dël **passà fisich**, che a comprend tuti ij pont-event da 'ndova a peulo parte segnaj vers l'origin, che as propago a velocità inferior a cola dla lus (èl lìmit a l'é dàit da le doe righe drite). Ant la tèrsa zòna, antorna a l'ass x , a-i sarò, se a esistèiso, pont anteressà da event su llinie orarie che a supon-o na propagassion con velocità superior a cola dla lus, che a esisto nen.

A l'é da noté che 'l pont-event ch'i l'oma sernù coma origin a a rpresenta gnum pont particolar, ma un pont genèrich qualunque. I suponoma che ant l'origin as treuva l'osservator. Rispét a sto pont as peulo antlora definì tre zone, dont un-a a l'é 'l futur ativ, andova l'osservator a peul agì con n'assion fisica, la sonda a l'é 'l passà passiv, che a arpresents j'event che a peulo avèj agì an sl'osservator, la tèrsa as podrà antérpreté coma ipotétich event che a peulo nen influensé an gnum-e manere l'osservator esercitand quàich assion fisica, e che l'osservator midem a peul nen influensé an gnum-e manere con quàich assion fisica.

Estension a tre dimension (x, y, t)

I anmaginoma, com i l'oma fait prima, che al temp $t = 0$ a parta un segnal luminos dal pont O èd coordinà $x = 0, y = 0$. Dòp un temp t sto segnal a riva al pont $P(x, y)$, e l'equassion dël ragg a sarà

$$\sqrt{x^2 + y^2} = ct \quad \text{vis-a-dì} \quad x^2 + y^2 - c^2 t^2 = 0$$

Costa equassion, considerà ant lë spassi-temp x, y, θ , a corispond a cola d'un còno ret con èl cò ant l'origin, dont j'intersession con èd pian paraléj a al pian xy a son sercc con senter ant l'intersession dël pian con l'ass θ , e dont le generatris a son le llinie orarie dij ragg luminos che a parto da O an tute le diressions dël pian xy . Èl còno midem a l'é dit èl "còno 'd lus".

I podoma dì, sensa gionté d'àutre spiegassion èd còse intuitive, che tuti ij pont-event contnù ant la part superior dël còno, comprèis fra le generatris e l'ass θ positiv, a arpresents èl **futur fisich**, vis-a-dì tuti ij pont che as peulo ragiunge da l'origin con pont (segnaj) che as bogio a velocità inferior a

cola dla lus (él lìmit a l'é dàit da le generatris). La sonda a l'é cola comprèisa antorna a l'ass θ negativ e le generatris dla part inferior dël còno, e a l'é dita cola dël **passà fisich**, che a comprend tuti ij pont-event da 'ndova a peulo parte segnaj vers l'orìgin, che as propago a velocità inferior a cola dla lus (él lìmit a l'é dàit da le generatris). Ant la tèrsa zòna, antorna al pian xy , a-i sario, se a esistèiso, pont anteressà da event su lìnie orarie che a supon-o na propagassion con velocità superior a cola dla lus, che a esisto nen.




Figura 9 - Spassi-temp pér un pont an sël pian xy .

Estension a quat dimension (z, y, z, t)

A sta mira i l'oma pì nen un supòrt gràfich pér arpresenté 'l concét, ma l'estension a l'é sempe immedià, e a sta mira a dovràia nen presenté 'd problema. Èl pont as bogia adéss comùnque ant lë spassi ordinari, e a cost a corispond nè stass-temp a quat dimension.

Arfasend un discors a smijansa 'd col èd prima, i podoma supon-e che un segnal luminos a parta da l'orìgin O èd coordinà $x = 0, y = 0, z = 0$, al temp $t = 0$, e che dòp un dàit temp t a riva al pont $P(x, y, z)$. L'equassion dël ragg a sarà :

$$\sqrt{x^2 + y^2 + z^2} = ct \quad \text{vis-a-dì} \quad x^2 + y^2 + z^2 - c^2 t^2 = 0$$

Se i consideroma costa equassion ant lë spassi-temp a quat dimension, i vëddoma che a arpresenta n'ipercòno (ipercòno 'd lus) che a divid st'iperspassi ancora an tre zòne, dont la prima a arpresenta 'l **futur fisich**, che a stà da la part dle θ positive, e a l'é fàita da tuti coj pont-event che a peulo esse ragiongiù da un segnal ò d'àutr che a part da l'orìgin e a viagia a velocità minor a cola dla lus (él lìmit a son le "generatris" èd l'ipercòno che a corispond ai pont ragiongiù a la velocità dla lus). La sonda zòna a l'é fàita dai pont, da la part dle θ negative da 'ndova a peulo parte segnaj ò d'àutr che a van a l'orìgin con velocità minor a cola dla lus (él lìmit a son sempe le "generatris" dl'ipercòno) e ch a arpresenta 'l **passà fisich**. La tèrsa zòna, coma prima, a son coj pont-event che pér interagi con l'orìgin a l'avriù da manca 'd segnaj ò d'àutr con velocità superior a cola dla lus.

Pàgina lassà veuida apòsta

DINÀMICA RELATIVISTICA

I vardoma adéss com a càmbio j'equassion èd Newton, ò mej, coma coste equassion a peulo esse generalisà ant na formulassion che, pér velocità basse rispét a cola dla lus, as peusso identifiché ant j'equassion èd Newton.

Ant un sistema d'arferiment andova 'l pont a l'é a l'arpòs, l'equassion èd Newton $m \mathbf{a} = \mathbf{F}$ a val an manera precisa, a ven scrita con la notassion: $m_0 \mathbf{a}^* = \mathbf{F}^*$ e a l'é ciamà "*equassion dël moviment inissial*".

St'equassion a venta che a dventa covariant rispét a le trasformassion èd Lorentz. Èl problema a l'é pitòst complicà e a va bin pér na session pì completa an sla relatività. An coste nòte i butoma macassia an evidensa quàich concét important, conseguenta dla relatività d'Einstein.

Massa relativistica èd na partìcola

I l'oma vist che an sto camp la composition de velocità dla mecanica newtonian-a a arzulta modificà e i l'oma vist che a valo le fòrmule

$$v_x = \frac{v'_x + \vec{w}}{1 + \frac{\beta}{c} v'_x} ; \quad v_y = \frac{v'_y \sqrt{1 - \beta^2}}{1 + \frac{\beta}{c} v'_x} ; \quad v_z = \frac{v'_z \sqrt{1 - \beta^2}}{1 + \frac{\beta}{c} v'_x}$$

I partoma da la considerassion èl l'urt frontal èd doe partìcole che i consideroma elastiche pèrfet e identiche. I consideroma cost event an doi arferiment S e S' , con S' ch'as èspòsta an diression dl'ass x con na velocità w .

I sernoma 'l sistema S' an manera che le doe partìcole a viagio, rispét a sto sistema, con velocità v' e $-v'$ ant l'ordin, an manera paraléla a l'ass x .

I ciamoma v_1 e v_2 le velocità che, prima dl'urt, ste doe partìcole a l'han ant èl sistema S . An sto sistema a l'avran èdcò massa m_1 e m_2 ant l'ordin, e pér adéss i foma nen d'ipòtesi an sla possibl dipendensa dla massa da la velocità.

Ant l'urt a venta che as conserva tant la massa coma la quantità 'd moviment, còsa che a ven ilustrà da coste expression, viste ant èl sistema S .

$$m_1 + m_2 = M ; \quad m_1 v_1 + m_2 v_2 = M V$$

andova i l'oma ciamà M la massa total dël sistema e i l'oma indicà con V la velocità comun a le doe partìcole ant èl moment èd l'urt, sempe an S , che a corispond a zero ant èl sistema S' .

An nòstr cas, andova $v_1 = v'$ e $v_2 = -v'$ i otnoma che

$$v_1 = \frac{v' + w}{1 + \frac{v' w}{c^2}} ; \quad v_2 = \frac{-v' + w}{1 - \frac{v' w}{c^2}}$$

e da coste equassion e cole dla conservassion ch'i l'oma scrivù sì dzora i podoma oten-e:

$$m_1 v_1 + m_2 v_2 = (m_1 + m_2) V ; \quad m_1 \frac{v' + w}{1 + \frac{v' w}{c^2}} + m_2 \frac{-v' + w}{1 - \frac{v' w}{c^2}} = (m_1 + m_2) w$$

e da costa expression i arcavoma 'l rapòrt fra m_1 e m_2 , che a arzulta:

$$\frac{m_1}{m_2} = \frac{1 + \frac{v' w}{c^2}}{1 - \frac{v' w}{c^2}}$$

I l'oma vist prima che a val la relassion $\sqrt{1 - \frac{v^2}{c^2}} = \frac{\sqrt{1 - \beta^2}}{1 + \frac{\beta}{c} v_x'} \sqrt{1 - \frac{v'^2}{c^2}}$ fra ij mòduj dle velocità v e v' , coma misurà ant ij doi sistema, con velocità w l'un rispét a l'autr. An nòstr cas la relassion a dventa, pér v_1 e v_2 :

$$\sqrt{1 - \frac{v_1^2}{c^2}} = \frac{\sqrt{1 - \frac{w^2}{c^2}}}{1 + \frac{v' w}{c^2}} \sqrt{1 - \frac{v'^2}{c^2}} \quad ; \quad \sqrt{1 - \frac{v_2^2}{c^2}} = \frac{\sqrt{1 - \frac{w^2}{c^2}}}{1 - \frac{v' w}{c^2}} \sqrt{1 - \frac{v'^2}{c^2}}$$

e se i dividoma la sconda pér la prima i otnoma

$$\frac{\sqrt{1 - \frac{v_2^2}{c^2}}}{\sqrt{1 - \frac{v_1^2}{c^2}}} = \frac{\sqrt{1 - \frac{w^2}{c^2}}}{1 - \frac{v' w}{c^2}} \frac{1 + \frac{v' w}{c^2}}{\sqrt{1 - \frac{w^2}{c^2}}} = \frac{1 + \frac{v' w}{c^2}}{1 - \frac{v' w}{c^2}} \quad \text{ma sòn a val èdcò } \frac{m_1}{m_2}$$

e donca, a la fin i otnoma:

$$\frac{m_1}{m_2} = \frac{\sqrt{1 - \frac{v_2^2}{c^2}}}{\sqrt{1 - \frac{v_1^2}{c^2}}}$$

I soma partì da doe masse istésse, che ant un sistema a ripòs a l'avran l'istéssa massa m_0 . L'espression ch'i loma trovà a dis che ant un sistema andova na partìcola (un còrp an general) as bogia con na velocità v , la partìcola midema a l'ha na massa (inersial) proporsional inversa al fator $\sqrt{1 - \frac{v^2}{c^2}}$.

La massa m dla partìcola a l'é donca na fonsion èd soa velocità v ant èl riferiment andova as bogia, che, se m_0 a l'é soa massa a ripòs, a l'é dàita da:

$$m = \frac{m_0}{\sqrt{1 - \frac{v^2}{c^2}}}$$

Donca i l'oma che ant la Mecànica relativistica d'Einstein na partìcola a l'ha na massa m (is arferima nen a la quantità 'd matèria ma a la massa inersial com i l'oma definila ant la part 3) che a l'é fonsion èd soa velocità v . A l'arpòs sta massa a corispond a m_0 , dita "**massa pròpria**" opura "**massa intrínseca**" che a l'é l'istéss concét èd massa inersial newtonian-a. Pér velocità basse la diferensa fra m e m_0 a l'é d'autut trascuràbil, a basta pensé che a la velocità 'd 500 km/s, che a l'é già na bela velocità (na càpsula spassial che a seurt da la gravità dla tera a viagia a pòch èd pì che 11 km/s), la massa as moltiplifica pér un fator 1,00000139, pòch èd pì che un d'un milion.

An figura 10 i apertoma 'l rapòrt fra massa e massa d'arpòs an fonsion dla velocità, pér le àute velocità che 'd sòlit as arferissó an pràtica mach a partìcole sub-atòmiche.




Figura 10 - Variassion dla massa con la velocità

Equassion fondamentaj

Dal moment che 'l camp relativistich as àplica an pràtica a partícule sub-atòmiche, i pijoma coma esempi n'elettron che as bogia ant un camp eletromagnétich. Le fòrse che a interven.o a son dëscrivùe ant la part sinch, ma pér lòn ch'as arferis a j'aspét relativistich i faroma an manera che as peussa capì lòn ch'as dis bele che sensa avèj già lesù cola part. L'equassion èd partensa a l'é sempe cola èd Newton:

$$\frac{d(m\vec{v})}{dt} = \vec{F}$$

andova, an sto cas, m a l'é la massa dl'elettron, \vec{v} a l'é soa velocità, e la fòrsa \vec{F} a l'é dàita da:

$$\vec{F} = e(\vec{E} + \vec{v} \wedge \vec{B})$$

andova e a l'é la cària dl'elettron E a l'é 'l camp elétrich e \vec{B} a l'é l'indussion magnética.

I definima sepe coma "**Potensa P** " dla fòrsa \vec{F} l'espression $P = \vec{F} \times \vec{v}$. Se i pijoma l'espression dla fòrsa ch'i l'oma scrivù sì dzora, dal moment che \vec{v} e $\vec{v} \wedge \vec{B}$ a son ortogonaj, nòstra potensa as arduv a $P = \vec{F} \times \vec{v} = e \vec{E} \times \vec{v}$. La potensa a l'é donca mach anlià a la fòrsa elétrica, mentre 'l camp magnétich a fà nen travaj.

I l'avroma 'dcò che, pér sta potensa, i podoma scrive:

$$\frac{d(m\vec{v})}{dt} \times \vec{v} = \vec{F} \times \vec{v} = m \frac{d\vec{v}}{dt} \times \vec{v} + m \frac{d\vec{v}}{dt} \times \vec{v}$$

e dal moment che 'l travaj elementar dT^1 a l'é dàit da la potensa pér 'l temp elementar, i l'avroma:

$$dT = \vec{F} \times \vec{v} dt = m \vec{v} d\vec{v} + \vec{v} dm$$

Dovrand l'espression ch'i l'oma trovà pér la massa relativistica i l'avroma:

$$\begin{aligned} dT &= \frac{m_0 v}{\sqrt{1-\beta^2}} dv + \frac{m_0 v^3}{c^2 \sqrt{(1-\beta^2)^3}} dv = \frac{m_0 v c^2 (1-\beta^2) dv + m_0 v v^2 dv}{c^2 \sqrt{(1-\beta^2)^3}} = \\ &= \frac{m_0 v dv}{c^2 \sqrt{(1-\beta^2)^3}} \left(1 - \frac{v^2}{c^2} c^2 + v^2 \right) = \frac{m_0 v dv}{c^2 \sqrt{(1-\beta^2)^3}} = d \left(\frac{m_0 c^2}{\sqrt{1-\beta^2}} \right) = d(m c^2) \end{aligned}$$

¹) - I arcordoma che an coste nòte i dovroma T pér "travaj" e E_c pér "Energia cinética".

Sòn a pòrta a l'amporanta conclusion che 'l travaj elementar a l'é 'l diferensial precis dla quantità mc^2 . Èl travaj fàit ant l'interval fra t_1 e t_2 as oten integrand fra sti doi lìmit.

$$T = (mc^2)_{t_2} - (mc^2)_{t_1}$$

I podoma antlora buté l'espression dl'energia cinética relativistica E_c , com i l'avio fàit prima, an mecanica clàssica, ant la forma:

$$E_c = mc^2 + K$$

andova K a l'é na costant che i podoma serne an manera che $E_c = 0$, cand a l'é $v = 0$. Antlora i l'oma che a velocità zero la massa a val m_0 e donca $K = -m_0 c^2$.

A sta mira l'espression dl'energia cinética a dventa:

$$E_c = (m - m_0)c^2 = m_0 c^2 \left(\frac{1}{\sqrt{1 - \beta^2}} - 1 \right)$$

Se i svilupoma an serie 'd potense 'd β^2 l'espression $\frac{1}{\sqrt{1 - \beta^2}}$ e is fermoma ai prim termo i l'avroma che $\frac{1}{\sqrt{1 - \beta^2}} = 1 + \frac{1}{2}\beta^2 \dots$. Ant èl cas èd $v \ll c$ l'aprossimassion a l'é pì che bon-a, e nòstra energia cinética as arduv a:

$$E_c = (m - m_0)c^2 \approx m_0 c^2 \left(1 + \frac{1}{2}\beta^2 - 1 \right) = m_0 c^2 \left(\frac{1}{2} \frac{v^2}{c^2} \right) = \frac{1}{2} m_0 v^2$$

che a l'é la sòlita espression dl'energia cinética an mecanica newtonian-a.

Èl travaj T fàit da le fòrse che a agisso an sla particola fra t_1 e t_2 a l'é donca dàit da la variassion dl'energia cinética E_c :

$$T = (E_c)_{t_2} - (E_c)_{t_1}$$

Massa e energia

I podoma scrive l'espression dl'energia cinética ant la forma: $m - m_0 = \frac{E_c}{c^2}$. Sòn a dis che ant la mecanica relativistica l'aument d'energia cinética d'un còrp as manifesta con n'increment èd massa inersial. An d'autri termo as peul disse che a l'energia cinética che un còrp a l'ha, a l'é socià na massa $\frac{E_c}{c^2}$. Tnisend cont che l'energia as peul trasformé an d'autre forme d'energia 'd vàire tipo, a ven pitòst natural generalisé l'espression sì dzora a na qualonque forma d'energia, disend che a na quantità d'energia E (sot qualonque forma) a corispond na massa m dàita da la relassion: $m = \frac{E}{c^2}$.

An manera ressiproca, se a ògni energia a corispond na massa, a l'istessa manera, a na massa qualonque, che as bogia a ch'a sia férma, a l'é natural socé n'energia $E = m c^2$, e an particolar a un còrp ferm a sarà socià l'energia $E = m_0 c^2$.

Sòn a veul dì che pèr ògni variassion dl'energia ΔE d'un còrp comunque provocà (da efet cinétich, eletrich, magnétich, termich, chimich, e via fòrt) a venta spetésse na variassion èd massa Dm che a sarà: $\Delta m = \frac{\Delta E}{c^2}$

Dàit èl valor èd c^2 , a l'é ciàir che costa variassion èd massa a sarà motobin cita, tant da esse 'd sòlit nen rivelàbil. Macassia as peul noté che ant un sistema isolà, la massa e l'energia as conservo

nen ognidun-a da sola, com a suponìa la mecanica newtonian-a, ma a-i é un prinsipi 'd conservassion generalisà che a dis che lòn ch'a resta costant an tute le trasformassion a l'é la grandëssa $m_0 c^2 + E$.

La corispondensa fra energìa e massa a fà supon-e che se n'energìa E as propaga con na dàita velocità v , a sta propagassion a l'é socià na dàita quantità 'd moviment Q che a sarà:

$$\vec{Q} = m \vec{v} = \frac{E}{c^2} \vec{v}$$

che i vëddroma torna parland ëd propagassion dj'onde eletro-magnétique ant la part sinch.

Misure 'd verìfica sperimental

La teorìa dla Relatività a l'é stàita acetà 'dcò pérchè suportà da verìfiche sperimentaj che sì i acenoma giusta, sensa andé ant l'ancreus.

Verìfica dla dipendensa dla massa da la velocità

Cost esperiment a l'é basà su eletron che a viagio con na dàita energìa conossùa (da emission radioativa β , opura acelerà da un camp elétrich conossù) e peui mandà a në spetròmetro 'd massa, andova as peul misuré la deviassion ant un camp elétrich, che a sarà fonsion dla cària e dla massa. J'arzultà a son coj antivist da la teorìa dla Relatività, e nen coj che as podrò supon-e considerand na massa dl'eletron costanta.

Verìfica dl'echivalensa energìa-massa

Sta preuva a peul esse pì fàcil fàita pér le reaccion nuclear, andova as peul misuré con precision la massa dle particole che a reagisso (con në spetròmeter ëd massa) e l'energìa che a ven svilupa opura assurbìa.

La reaccion la pì dovrà an costa verìfica a l'é d'àtom ch'a ven-o colpì da particole, e che as trasformo an d'autri àtom emëttend a soa vira na particola. Ant la reaccion a ven liberà ò assurbìa n'energia dàita da la diferensa fra l'energia dle particole prima da reaccion e cola dle particole dòp la reaccion. Se i ciamoma sta quantità d'energia Q , i l'avroma che $\Delta M = \frac{Q}{c^2}$, andova ΔM a l'é la diferensa 'd massa fra le particole che a l'han reagi e cole che a arzultò da la reaccion.

Na clàssica reaccion dë sto tipo a l'é cola 'd bombardé lítio Li_3^7 con ed proton H_1^1 andova as oten-o doe nos d'elio He_2^4

L'esperiment a l'é organisà an manera 'd podèj misuré lòn ch'a serv, e as oten, da l'energìa cinética dle particole che la reaccion a produv n'energìa $Q = 17,13 \pm 0,1 MeV$. Le masse an geugh a son (an unità atòmiche) $Li_3^7 = 7,01822$; $H_1^1 = 1,008146$; $He_2^4 = 4,00388$.

Prima dla reaccion la massa a l'é $8,026366$ mentre dòp la reaccion a l'é $8,00776$ con na diminussion ëd $\Delta M = 0,0186$ unità atòmich 'd massa, che a corrispondo, secon la lèj dl'echivalensa ch'i l'oma vist, a n'energìa ëd $17,27 MeV$, bin davzin a lòn ch'as misura.

Pàgina lassà veuida apòsta

FORMULASSION LAGRANGIAN-A E HAMILTONIAN-A

I doma adéss, e bin ampréssa, n'uciada a com a dvento le firmulassion Lagrangian-a e Hamiltonian-a cand as ten cont dij prinsipi dla Mecànica Relativistica.

Formulassion Lagrangian-a

Se j'arzultà che i l'oma trovà sì dzora a venta che a sio consistent con la formulassion Lagrangian-a, pròpi coma ant èl cas dla situassion nen relativistica, antlora a venta che :

$$p_i = \frac{\partial L}{\partial x_i} \quad \text{vis - a - dì} \quad \frac{m \dot{x}_i}{\sqrt{1 - \beta^2}} = \frac{\partial L}{\partial x_i}$$

e dal moment ch'i l'oma vist che $\beta = \frac{v}{c}$ con v = velocità dla partìcola e c = velocità dla lus, e ancora,

che nòstr v a l'é $v = \sqrt{\sum_i \dot{x}_i^2}$ (con x_i = coordinà generalisà èd nòstra partìcola), i l'avroma che

$\beta^2 c^2 = \sum_i \dot{x}_i^2$. Integrando arcavala Lagrangian-a L , che a val:

$$L = m c^2 \sqrt{1 - \beta^2} - V(x_i)$$

andova $V(x_i)$ a l'é la costant d'integrazione. A costa Lagrangian-a a corrispondon j'equassion èd Lagrange dèl moviment, arportà sì sota.

$$-\frac{\partial V}{\partial x_i} = \frac{d}{dt} \left(\frac{m \dot{x}_i}{\sqrt{1 - \beta^2}} \right) \quad \text{vis - s - dì} = \frac{d}{dt} p_i$$

ma da prima i arcavoma 'dcò che $F_i = \frac{d}{dt} \left(\frac{m \dot{x}_i}{\sqrt{1 - \beta^2}} \right) = \frac{d}{dt} p_i$, e donca l'equassion èd Lagrange a va bin

se i podoma dì che la fòesa F_i a val $F_i = \frac{\partial V}{\partial x_i}$, e sòn a l'é nen fàcil da trové. A-i sarò, bin sicur, le fòrse

gravitassionaj, ma coste a ciama un tratament che a stà fòra da la trattassion dla relatività strèita. Se as considera na partìcola sensa fòrse da fòra (vis-a-dì con $V = 0$), antlora as peul apliche la fonsion Lagrangian-a ch' i loma vist, e as peul èdcò estende 'l rasonament a un sistema 'd partìcole lìbere. As peul nen, macassìa, consideré un còrp rèid, dal moment che a ventrà consideré interassion fra partìcole che as propago a l'istant.

Fòrsa 'd Lorentz ant un camp eletro-magnétich

Dal moment che la teorìa dla relatività a l'é stàita svilupà pèr include tuti ij fenòmeno fisich, a l'é rasonà spetésse che as peussa dëscrive un moviment èd na cària ant un camp eletro-magnétich sota la fòrsa 'd Lorentz. Ant la session èd coste nòte ch'a fà sinh i dëscrivoma la costion ant èl cas nen-relativistich, mentre an costa session, ant la part ch'a fa eut, i l'oma trovà che la fòrsa 'd Lorentz che, su na cària e che a viagia a velocità v , a val $\vec{F} = e \left(\vec{E} + \frac{1}{c} \vec{v} \wedge \vec{B} \right)$, a peul esse scomponùa an soe component e butà ant la forma:

$$F_i = e \left(\frac{d}{dt} \frac{\partial}{\partial \dot{x}_i} - \frac{\partial}{\partial x_i} \right) \left(\phi - \frac{1}{c} \vec{v} \times \vec{A} \right)$$

e pér él moviment dla partícola a val l'equassion éd Lagrange:

$$\frac{d}{dt} \left(\frac{\partial L}{\partial \dot{q}_i} \right) - \frac{\partial L}{\partial q_i} \quad \text{andova} \quad L = Ec - e \left(\phi - \frac{1}{c} \vec{v} \times \vec{A} \right)$$

Se costa expression a fonsion-a 'ncora ant él cas relativistich, antlora a venta che :

$$\frac{d}{dt} \left(\frac{m \dot{x}_i}{\sqrt{1 - \beta^2}} \right) = e \left(\frac{d}{dt} \frac{\partial}{\partial \dot{x}_i} - \frac{\partial}{\partial x_i} \right) \left(\phi - \frac{1}{c} \vec{v} \times \vec{A} \right)$$

e sòn a peul esse verificà da na mira sperimental, con le \dot{x}_i che a arpresento le velocità. Coste equassion dël moviment a peulo esse derivà dal prinsipi éd Hamilton $\delta \int L dt = 0$, con na fonsion lagrangian-a che a val $L = -mc^2 \sqrt{1 - \beta^2} - e \left(\phi - \frac{1}{c} \vec{v} \times \vec{A} \right)$.

Formulassion Hamiltonian-a

I restoma ant la considerassion dla partícola carià ant un camp eletromagnétich. Se i dovroma la definission che i l'oma dait éd moment $p_i = \frac{\partial L}{\partial \dot{x}_i}$, dovrànd la L ch'i l'oma scrivù sì dzora, i trovoma che le component corispondente a cole dël moment, pér na partícola carià ant un cùmp eletromagnétich a son dàite da:

$$p_i = \frac{m \dot{x}_i}{\sqrt{1 - \beta^2}} + \frac{e}{c} A_i$$

Al moment i podoma nen dì gnente a propòsit éd na component corispondenta al temp. La fonsion Hamiltonian-a a peul esse scrivùa coma:

$$H = \sum_i p_i \dot{q}_i - L = \sum_i p_i \frac{\sqrt{1 - \beta^2}}{m} \left(p_i - \frac{e}{c} A_i \right)$$

e sensa andé a fé tuti ij passagi, costa equassion a pòrta a scrive:

$$H = \frac{mc^2}{\sqrt{1 - \beta^2}} + e\phi$$

La variassion dl'energia cinética Ec dla partícola a l'é dàita da:

$$\frac{dE_c}{dt} = \sum_i \dot{x}_i \frac{d}{dt} p_i = \sum_i \dot{x}_i \frac{d}{dt} \left(\frac{m \dot{x}_i}{\sqrt{1 - \beta^2}} \right) = \frac{d}{dt} \left(\frac{mc^2}{\sqrt{1 - \beta^2}} \right)$$

Se i suponoma, com a l'é rasonà, che $Ec = 0$ cand $\dot{x}_i = 0$, l'integression a pòrta a dì:

$$E_c = mc^2 \left(\frac{1}{\sqrt{1 - \beta^2}} - 1 \right)$$

Ma i podoma 'dcò combiné l'equassion dël moviment ch'i l'oma vist parland dla formulassion Lagrangian-a con l'espression dla variassion dl'energia cinética, e i otnoma che:

$$\frac{dE_c}{dt} = \sum_i e \dot{x}_i \left(\frac{d}{dt} \frac{\partial}{\partial \dot{x}_i} - \frac{\partial}{\partial x_i} \right) \left(\phi - \frac{1}{c} \vec{v} \times \vec{A} \right) = e \vec{v} \times \left(\vec{E} + \frac{1}{c} \vec{v} \wedge \vec{B} \right) = e \vec{v} \times \vec{E}$$

ma 'l camp elétrich E a peul esse dëscrivù an trmp 'd potensiaj coma:

$$\vec{E} = -\nabla \phi - \frac{1}{c} \frac{\partial \vec{A}}{\partial t}$$

e antlora i podoma scrive:

$$\frac{dE_c}{dt} = -e \vec{v} \times \left(\nabla \phi + \frac{1}{c} \frac{\partial \vec{A}}{\partial t} \right) = -\frac{d}{dt}(e\phi) + e \frac{\partial \phi}{\partial t} - \frac{e}{c} \vec{v} \times \frac{\partial \vec{A}}{\partial t}$$

e donca:

$$\frac{d}{dt}(E_c + e\phi) = -e \left(\frac{\partial \phi}{\partial t} - \frac{1}{c} \vec{v} \times \frac{\partial \vec{A}}{\partial t} \right)$$

che as peul èdcò butè coma : ($m c^2$ a dipend nen da t)

$$\frac{d}{dt}(mc^2 + E_c + e\phi) = -e \left(\frac{\partial \phi}{\partial t} - \frac{1}{c} \vec{v} \times \frac{\partial \vec{A}}{\partial t} \right)$$

La quantità $(mc^2 + E_c + e\phi)$ a peul esse interpretà coma l'energia total dla partìcola. I notoma che le formulassion Lagrangian-a e Hamiltonian-a a peulo serve a dëscrive 'l moviment relativistich èd na partìcola carià ant un camp eletromagnétich, ma l'estension a un sistema 'd partìcole opura a d'autre situassion a l'é nen imedià e gnanca fàcil.

An conclusion

I l'oma vist ampréssa ij prinsipi dla relatività strèita, vis-a-dì cola limità ai sistema inersiaj, andova a dovràa nen essie gnanca na gravità. A l'é ciàir che pér na descrission completa sòn a l'é trop pòch, e an efét Einstein a l'ha peui estendù ij sò prinsipi a comprende na dëscrission dla gravità e 'd tuti ij sistema d'arferiment an moviment qualonque.

An sto passagi, macassìa, le còse a dvento motobin pì complicà, e se i arcordoma che an prinsipi èd costa ciaciaràda i l'avìo definì un "*quadrà dl'element linear*" dël crontòpo la forma diferensial $ds^2 = c^2 dt^2 - dx^2 - dy^2 - dz^2$, che a peul esse definì "pseudoeuclideo", ant l'estension general dla teorìa sta forma a ven sostituìa da na forma dël tipo $ds^2 = \sum_{\alpha, \beta=1}^4 g_{\alpha, \beta} dx^\alpha dx^\beta$ andova ij coeficent $g_{\alpha, \beta}$ a son determinà da la distribussion dla matéria.

I l'oma giontà sòn nen pér fé vèdde ch'i lo savoma (mal), ma giusta pér dì che pér le studi dla Relatività a-i é motobin èd pì èd travaj da fé. L'istéssa còsa as peul dì cand as serca d'introduve, an general, la tratassion dla relatività con el formalism Lagrangian ò Hamiltonian.

Noiàutri is contentoma 'd fèrmésse ambelessì.

Pàgina lassà veuida apòsta